



AN COIMISIÚN
EORPACH

An Bhruiséil, 14.7.2023
COM(2023) 453 final

TUARASCÁIL ÓN gCOIMISIÚN

Faireachán ar chur i bhfeidhm dhlí an Aontais Eorpaigh

Tuarascáil Bhliantúil 2022

Réamhrá.....	3
An Comhaontú Glas don Eoraip	4
Aer agus uisce glan.....	4
Rioscaí tuilte a bhainistiú.....	5
Cosaint na bithéagsúlachta.....	5
Geilleagar ciorclach a chur chun cinn.....	6
Gníomhú ar son na haeráide.....	7
Fuinneamh glan	7
Margadh aonair d'fhuinneamh	8
Iompar glan.....	9
Talmhaíocht inbhuanaithe lena gcinntítear an soláthar bia.....	9
Iascaigh inbhuanaithe agus pleanáil spásúil mhuirí.....	10
Sláinte agus sábháilteacht bia.....	11
Cosc a chur le galair a bhaineann le tobac	11
Iompar níos sábháilte	12
Eoraip atá oiriúnach don Aois Dhigiteach.....	13
Teicneolaíocht a oibríonn do na daoine	13
Geilleagar digiteach atá cóir agus iomaíoch.....	14
An geilleagar sonraí a chur chun cinn	14
Sochaí dhigiteach atá oscailte, daonlathach agus inbhuanaithe	14
Cosaint do thomhaltóirí agus do chuideachtaí.....	15
Táirgí, seirbhísí agus suíomhanna gréasáin inrochtana	16
Ligean do mhéadú ar fhás an mhargaidh aonair	16
Faisnéis thrédhearcach faoi ghnólachtaí agus do ghnólachtaí.....	17
Córais iompair dhigitigh.....	18
Geilleagar a fhóireann do na daoine	19
Dálaí oibre.....	19
Sláinte agus sábháilteacht ag an obair.....	20
Soghluaisteacht an lucht saothair	20
Comhordú na gcóras slándála sóisialta	21
Faisnéis agus cúnamh níos fearr do shaoránaigh agus do ghnólachtaí.....	21
Rialáil níos fearr ar ghairmeacha agus aitheantas níos fearr do cháilíochtaí.....	21
Féimheacht cuideachtaí inmharthana a chosc.....	22

Seirbhísí airgeadais	22
Íocaíochtaí miondíola	23
Maoirseacht a dhéanamh ar chur i bhfeidhm rialacha seirbhísí airgeadais an Aontais ag údaráis náisiúnta	23
Sciúradh airgid agus maoiniú na sceimhlitheoireachta	24
Soghluaisteacht agus iompar	24
Cánachas díreach	25
Cánachas indíreach	26
Custam	28
An dóigh bheatha Eorpach agus an daonlathas a chur chun cinn	29
An smacht reachta	29
Daoine a thuairiscíonn sáruithe ar dhlí an Aontais a chosaint	30
Idirdhealú, ciníochas agus seineafóibe a chomhrac	30
Cothromaíocht oibre is saoil a chur chun cinn	31
Sonraí pearsanta a chosaint	31
Saoránacht an Aontais a chosaint	31
Comhar breithiúnach agus cearta duine aonair in ábhair choiriúla	32
Slándáil	32
Imirce agus Tearmann	33
Smachtbhannaí a chur i bhfeidhm i gcoinne na Rúise	34

Séanadh: Leagtar amach sa tuarascáil seo gníomhaíochtaí an Choimisiúin chun faireachán agus forfheidhmiú a dhéanamh ar dhlí an Aontais le linn 2022. D'fhéadfadh staid na himeartha maidir le cásanna um shárú a luaitear anseo a bheith tagtha chun cinn ó shin i leith.

Réamhrá

Bhí an bhliain 2022 ar cheann de na coir chinniúnacha ba dhorcha i stair na mór-roinne seo le déanaí. Tháinig an cogadh ar ais san Eoraip agus bhí tionchar láithreach aige orainn go léir. Bhí eagla ar a lán daoine ní amháin roimh na hiarmhairtí don Úcráin, ach go rachadh an chuid eile den Eoraip isteach i gcúlú eacnamaíochta, go réabfaí an daonlathas agus go mbeadh deighilt ann sa phobal freisin. Ina áit sin, sheasamar an fód. Leanann streachailt na hÚcráine ar son na saoirse d'inspioráid a thabhairt dúinn, agus spreagann sé an tAontas Eorpach tacaíocht airgeadais, mhíleata agus pholaitiúil, nach bhfacthas riamh cheana, a choinneáil ar bun.



Agus cé go bhfuilimid, agus go bhfanfaimid, gan staonadh inár dtacaíocht don Úcráin, táimid ag leanúint ar aghaidh na hathruithe ó bhonn a gheallamar ag tús shainordú an Choimisiúin seo a chur chun feidhme, chun Eoraip níos láidre, níos glaise agus níos sláintiúla a chruthú don chéad ghlúin eile.

Chun na hathruithe sin a bhaint amach, tá raon leathan tograí agus straitéisí uailmhianacha curtha chun cinn againn. Ach ní féidir ár n-uailmhianta a bhaint amach – agus ní rachaidh siad chun leasa na nEorpach go léir, is cuma cá bhfuil siad ina gcónaí – mura n-aontaítear na rialacha a mholfaimid sa Bhruiséil agus mura gcuirtear i bhfeidhm go ceart iad ar an talamh fud fad an Aontais.

Leagtar amach sa tuarascáil seo na gníomhartha a rinneamar in 2022 chun a chinntiú go n-oibreodh na rialacha sin go praiticiúil. Chuireamar rialacha an Aontais i bhfeidhm thar gach réimse beartais, ag díriú ar na saincheistanna is tábhachtaí do shaol laethúil daoine agus gnólachtaí. Dá bhrí sin, bhain an chuid is mó de na nósanna imeachta a thionscnaíomar in 2022 leis an gcomhshaol, leis an gceartas, le cearta bunúsacha, leis an margadh aonair agus leis an bhfostaíocht.

Nuair a thagann fadhbanna chun cinn, oibrímid go dlúth leis na Ballstáit ar dtús chun iarracht a dhéanamh iad a réiteach a luaithe is féidir. Agus is minice a éiríonn linn. Mar a léiríonn an tuarascáil, áfach, ní bhíonn aon drogall orainn gníomhaíocht fhorfheidhmithe a dhéanamh nuair is gá chun a chinntiú go mbeidh ár nAontas fós ina spás sábháilte le rathúnas comhroinnte, daonlathas den scoth agus pobal láidir atá bunaithe ar ár luachanna.

Le meas,

An Dr Ursula von der Leyen

Uachtarán an Choimisiúin Eorpaigh

An Comhaontú Glas don Eoraip

‘Ní mór dúinn oibriú gan staonadh chun dul in oiriúint dár n-aeráid – trína chinntiú gurb é an dúlra an comhghuaillí is fearr atá againn.’

An tUachtarán von der Leyen san Aitheasc a thug sí faoi Staid an Aontais in 2022



An t-athrú aeráide agus díghrádú an chomhshaoil, is baol go gcuirfidh siad deireadh leis an saol san Eoraip agus sa domhan mór. Mar gheall ar na tonnta teasa, na tinte foraoise agus na triomaigh in 2022, nach bhfacthas a leithéid riamh roimhe, táthar ag brath ar fud an domhain go bhfuil a n-éifeachtaí ag éirí níos déine. Tá sé bunriachtanach dlús a chur le haistriú glas an Aontais chun dul i ngleic leis an ngéarchéim aeráide agus chun geilleagar agus slándáil an Aontais a neartú. Leagtar amach sa [Chomhaontú Glas don Eoraip](#) an bealach i dtreo [truailliú nialasach](#) don aer, don uisce agus don ithir, agus chun geilleagar an Aontais a athrú go geilleagar atá nua-aimseartha agus tíosach ar acmhainní. In 2022, d'fhorfheidhmigh an Coimisiún rialacha an Aontais go dian chun na cuspóirí sin a bhaint amach.

Aer agus uisce glan

Is é truailliú aeir an riosca is mó do shláinte an chomhshaoil san Eoraip. Tá rialacha an Aontais maidir le [caighdeáin cháilíochta aeir](#) ríthábhachtach chun éifeachtaí diúltacha an truaillithe aeir ar shláinte an duine a laghdú: le 30 bliain anuas, tá laghdú 60% tagtha ar líon na mbásanna roimh am mar gheall ar thruailliú aeir sna Ballstáit. Lean an Coimisiún de na caighdeáin seo a fhorfheidhmiú gan staonadh chun sláinte an duine agus an comhshaol nádúrtha a chosaint.

D'éiligh an Coimisiún go ndéanfaí cóireáil chuí ar [fhuíolluisce](#). Chuir sé an [Treoir maidir le hUisce Óil](#) i bhfeidhm freisin chun a chinntiú go bhfuil uisce atá ceaptha do thomhaltas an duine folláin agus glan.

Ghlac an Coimisiún an chéad chéim eile ina imeachtaí um shárú i gcoinne [na Cróite](#) mar gheall ar dhroch-chaighdeán an aeir de bharr leibhéil arda ábhair cháithnínigh (PM₁₀) agus mínábhair cháithnínigh (PM_{2.5}). D'iarr sé ar [an bPolainn](#) deireadh a chur le bacainní ar rochtain ar cheartas i ndáil le pleananna cáilíochta aeir faoin [Treoir maidir le Cáilíocht an Aeir Chomhthimpeallaigh](#). Ghlac an Coimisiún an chéad chéim eile sa nós imeachta i gcoinne [na Cipire](#) toisc gur mhainnigh an tír sin an [Treoir maidir le Gléasraí Dócháin Meánmhéide](#) a thrasú go hiomlán. Bunaítear leis an Treoir teorainneacha astaíochtaí do ghléasraí dócháin meánmhéide chun truailliú aeir a laghdú.

Chinn an Coimisiún [an Spáinn](#), [Málta](#) agus [an Pholainn](#) a tharchur chuig Cúirt Bhreithiúnais an Aontais Eorpaigh maidir leis an gcaoi a ndéantar cóireáil ar fhuíolluisce sna tíortha sin. Ghlac sé an chéad chéim eile freisin sa nós imeachta i gcoinne [na hUngáire](#) maidir le substaintí in uisce óil a d'fhéadfadh a bheith ina gcontúirt do shláinte an duine.

Rioscaí tuilte a bhainistiú

Léirigh na tuilte turraingeacha sa Ghearmáin agus sa Bheilg i mí Iúil 2021 an tábhacht a bhaineann le measúnú a dhéanamh ar rioscaí tuilte i bhfianaise an athraithe aeráide. Ina theannta sin, is féidir le tuilte truailléin atá stóráilte sa talamh a scaoileadh agus iad a scaipeadh níos forleithne fós. Leis an [Treoir Tuilte](#) éilítear ar Bhallstáit pleananna a ghlacadh chun rioscaí tuilte a bhainistiú, rud atá ríthábhachtach d'fhreagairt thapa. Ghlac an Coimisiún an chéad chéim eile i nósanna imeachta um shárú i gcoinne [na Bulgáire](#), [na Gréige](#), [na Cipire](#), [na Liotuáine](#), [na Rómáine](#) agus [na Slóvaice](#) chun a chinntiú go bhfuil léarscáileanna nuashonraithe um riosca tuilte ann.

Cosaint na bithéagsúlachta

Tá sé mar aidhm ag an gComhaontú Glas don Eoraip agus an [Straitéis Bithéagsúlachta do 2030](#) araon go gcuirfidh an tAontas stop lena chaillteanas bithéagsúlachta. Ba cheart é sin a bhaint amach trí shuíomhanna nádúrtha a chaomhnú agus éiceachórais dhamáistithe a thabhairt ar ais go stádas caomhantais fabhrach i ngnáthóga a bhfuil ról ríthábhachtach acu don bithéagsúlacht. Tá sé riachtanach foraoisí, ithreacha, bogaigh agus limistéir mhuirí a athchóiriú chun an maolú ar an athrú aeráide a theastaíonn faoi 2030 a bhaint amach.



Foráiltear le [rialacha AE](#) freisin go bhféadfaidh páirtithe, a bhfuil tionchar ag an damáiste don chomhshaol orthu, iarraidh ar an údarás náisiúnta freagrach cinneadh a dhéanamh maidir leis an ngníomhaíocht choiscitheach agus feabhais ar cheart don oibreoir faoi dhliteanas a dhéanamh. D'iarr an Coimisiún ar [an Ísiltír](#) agus ar [an tSualainn](#) na rialacha sin a thrasú i gceart. Ag an am céanna, bhí an Coimisiún in ann cúig chás a dhúnadh toisc gur chuir na Ballstáit a rialacha i gcomhréir le dlí an Aontais. Leis sin cinntíodh gur féidir le gach duine, ar chóir an ceart seo a

bheith acu, faisnéis a chur isteach agus a iarraidh ar na húdaráis gníomhú maidir le damáiste don chomhshaol.

I gcás a tháinig chun cinn mar thoradh ar achainí chuig Parlaimint na hEorpa, d'iarr an Coimisiún ar [an Spáinn breithiúnas](#) ón gCúirt Bhreithiúnais a chur chun feidhme maidir leis na bogaigh Doñana, chun gnáthóga cosanta a chosaint agus na dobharlaigh screamhuisce a bheathaíonn na bogaigh sin a bhainistiú go hinbhuanaithe.

Chinn an Coimisiún [an Ghréig](#) a tharchur chuig an gCúirt Bhreithiúnais toisc gur mhainnigh sí an [Treoir maidir le Measúnú](#) ar an [Tionchar Comhshaoil](#) a thrasú i gceart. D'iarr an Coimisiún ar [an Spáinn](#) éifeachtaí díobhálacha coimpléisc óstáin sna hOileáin Chanáracha ar an gcomhshaol a leigheas. D'iarr an Coimisiún freisin ar [an bhFrainc](#) a reachtaíocht a chur go hiomlán i gcomhréir leis an Treoir. Sa Chipir, ar an taobh eile, rinneadh na rialacha náisiúnta a ailíniú agus dhún an Coimisiún a chás um shárú. Leis sin neartófar an measúnú ar iarmhairtí tionscadail don chomhshaol sa Chipir sula dtógfar é, rud atá bunriachtanach chun bithéagsúlacht a chosaint.

Ghlac an Coimisiún an chéad chéim eile sa nós imeachta i gcoinne [15 Bhallstát](#) chun an comhshaol a chosaint ar [speicis choimhthíocha ionracha](#). D'iarr sé freisin ar [an tSlóvaic](#), ar [an gCipir](#) agus ar [an bPortaingéil](#) a limistéir chosanta Natura 2000 a chosaint agus a bhainistiú faoin [Treoir maidir le Gnáthóga](#). D'iarr an Coimisiún freisin ar [an tSlóivéin](#) cloí leis an [Treoir maidir le hÉin](#) chun éin fhiáine a chosaint.

Geilleagar ciorclach a chur chun cinn

Tá an [plean gníomhaíochta don gheilleagar ciorclach](#) ina chuid lárnach den Chomhaontú Glas don Eoraip agus réitíonn sé an bealach i dtreo Eoraip níos glaine agus níos iomaíche. Cuireann sé aisghabháil dramhaíola chun cinn agus cuireann sé brú ar Bhallstáit caighdeáin bhainistithe dramhaíola an Aontais a chur i bhfeidhm go hiomlán. Cuidíonn forfheidhmiú na rialacha sin ag an gCoimisiún le héifeachtaí díobhálacha dramhaíola ar shláinte an duine agus ar an gcomhshaol a laghdú.

Thionscain an Coimisiún nósanna imeachta um shárú, nó lean sé dóibh a thuilleadh, i gcoinne [11 Bhallstát](#) toisc nach ndearna siad an [Treoir maidir le Plaistigh Aonúsáide](#) a thrasú go hiomlán. Is é is aidhm don Treoir an tionchar atá ag táirgí plaisteacha áirithe, a úsáidtear ar feadh tréimhse an-ghairid, ar an gcomhshaol agus ar shláinte an duine a chosc agus a laghdú.

Maidir le húsáid málaí plaisteacha, thug Éire a reachtaíocht i gcomhréir leis an [Treoir maidir le Málaí Plaisteacha](#), mar thoradh ar phróiseas réamhshárarithe a thionscain an Coimisiún (EU Pilot).

Maidir le cóireáil dramhaíola, d'iarr an Coimisiún ar [an bPortaingéil](#) a cleachtas a fheabhsú agus an [Treoir maidir le Líonadh Talún](#) agus an [Chreat-Treoir Dramhaíola](#) a chur i bhfeidhm i gceart.

Gníomhú ar son na haeráide

Tá sé mar sprioc ag an Aontas Eorpach go mbeidh an Eoraip ar an gcéad mhór-roinn atá neodrach ó thaobh na haeráide de faoi 2050. Leis an [Dlí Aeráide Eorpach](#) bunaíodh cuspóir idirmheánach glanastaíochtaí gás ceaptha teasa a laghdú 55% ar a laghad faoi 2030, i gcomparáid le leibhéal 1990. Tá an-tábhacht le straitéisí fadtéarmacha chun cuidiú leis an gclaochlú eacnamaíoch a theastaíonn leis na cuspóirí aeráide sin a bhaint amach. Ceanglaítear leis an [Rialachán maidir le Rialachais](#) ar na Ballstáit a gcéad [straitéisí fadtéarmacha](#) a ullmhú agus iad ag féachaint ar aghaidh 30 bliain ar a laghad. In 2022, thionscain an Coimisiún imeachtaí um shárú i gcoinne [na Bulgáire](#), [na hÉireann](#), [na Polainne](#) agus [na Rómáine](#) toisc nár thug siad fógra don Choimisiún faoi na straitéisí sin.



Fuinneamh glan

Tá dícharbónú chóras fuinnimh an Aontais ríthábhachtach chun cuspóirí aeráide an Aontais a bhaint amach. Chuir iarmhairtí phaindéim COVID-19 agus ionradh míleata na Rúise ar an Úcráin an próiseas seo faoi thástáil. D'fhan an Coimisiún meáite ar an [bpacáiste 'Fuinneamh Glan do gach Eorpach'](#) a chur chun feidhme: tá fuinneamh glan ag croílár an aistrithe fuinnimh i dtreo earnáil fuinnimh atá sábháilte, slán agus inbhuanaithe agus a thugann tús áite do thomhaltóirí.

Ní hamháin go bhfuil sé ríthábhachtach fuinneamh in-athnuaite a chur chun cinn ar mhaithe le cuspóirí aeráide an Aontais, ach cabhraíonn sé freisin leis an earnáil fuinnimh a chobhsú trí luaineacht an mhargaidh a laghdú, praghsanna fuinnimh a íslíú agus slándáil sholáthar fuinnimh an Aontais a neartú. Cuireann an [Treoir maidir le Fuinneamh In-athnuaite](#) an creat ar fáil chun fuinneamh in-athnuaite a fhorbairt san Aontas, agus tugann an Coimisiún tús áite dá forfheidhmiú.

Ós rud é gur theip ar Bhallstáit rialacha an Aontais a thrasuí, ghlac an Coimisiún an chéad chéim eile ina imeachtaí um shárú:

- [i gcoinne 15 Bhallstát](#) maidir leis an [Treoir lena leasaítear an Treoir maidir le Feidhmíocht Fuinnimh Foirgneamh](#);
- [i gcoinne 12 Bhallstát](#) maidir leis an [Treoir lena leasaítear an Treoir maidir le hÉifeachtúlacht Fuinnimh](#);
- [i gcoinne 15 Bhallstát](#) maidir leis an [Treoir maidir le Fuinneamh In-athnuaite](#).

Margadh aonair d'fhuinneamh

Margadh fuinnimh comhtháite AE, sin an bealach is costéifeachtaí le soláthairtí fuinnimh slána agus inacmhainne a chinntiú do dhaoine agus do ghnólachtaí. Le rialacha comhchoiteanna agus bonneagar trasteorann is féidir fuinneamh a tháirgtear i dtír AE amháin a sheachadadh ar thomhaltóirí i dtír AE eile. Le hiomaíocht agus rogha níos leithne soláthraithe fuinnimh do thomhaltóirí, coinnítear praghsanna faoi smacht. Cuireann margadh comhtháite le slándáil an tsoláthair agus leis an inbhuanaitheacht chomh maith.



Leis an [Treoir maidir le Leictreachas](#) déantar margaí iomaíocha den chineál sin a chinntiú d'earnáil an leictreachais thar theorainneacha tíre. Mar gheall ar an mbrú ar an earnáil fuinnimh in 2022 bhí sé thar a bheith tábhachtach go gcuirfeadh an Coimisiún na rialacha seo i bhfeidhm go daingean.

Lean an Coimisiún den nós imeachta um shárú i gcoinne [na Gearmáine](#) agus [na Sualainne](#) a thuilleadh toisc gur mhainnigh siad an Treoir maidir le Leictreachas a thrasú. Thionscain sé nósanna imeachta i gcoinne ocht [mBallstát](#) ar an gcúis chéanna.

Fuinneamh núicléach a choimeád sábháilte

Is féidir ról dearfach a bheith ag fuinneamh núicléach chun cuspóirí aeráide a bhaint amach agus slándáil fuinnimh a chinntiú, ar choinníoll go gcomhlíontar an leibhéal is airde sábháilteachta núicléiche agus cosanta ar radaíocht. Lean an Coimisiún ar aghaidh ag díriú ar chur chun feidhme éifeachtach chreat dlíthiúil Euratom maidir le sábháilteacht núicléach, rud a chosnaíonn oibrithe, othair agus an pobal ar radaíocht ianúcháin agus a dhéanann cinnte de go láimhseáiltear dramhaíl radaighníomhach ar bhealach sábháilte.

Ghlac an Coimisiún an chéad chéim eile sa nós imeachta i gcoinne [na Cróite](#), [na hEastóine](#), [na hIodáile](#), [na hOstaire](#), [na Portaingéile](#) agus [na Slóivéine](#) toisc nár ghlac siad cláir náisiúnta iomchuí chun dramhaíl radaighníomhach agus breosla spionta a bhainistiú i gcomhréir le [rialacha an Aontais](#). Dhún sé 23 chás EU Pilot maidir le trasú na [Treorach maidir le Sábháilteacht Núicléach](#) tar éis do na Ballstáit, i gcás inar ghá, rialacha náisiúnta nua a leasú nó a ghlacadh. Tháinig an Coimisiún ar an gconclúid go raibh an trasú sna Ballstáit sin ceart, rud a chuir le sábháilteacht núicléach níos láidre.

Rinne an Coimisiún [an Spáinn](#), [an Laitvia](#) agus [an Phortaingéil](#) a tharchur chuig an gCúirt Bhreithiúnais toisc gur mhainnigh na tíortha sin [reachtaíocht](#) an Aontais maidir le cosaint ar radaíocht a thrasú ina hiomláine. D'iarr sé ar [an Iodáil](#) cloí le [breithiúnas](#) ón gCúirt Bhreithiúnais ina bhfuarthas nach ndearna an Iodáil na rialacha sin a thrasú sa reachtaíocht náisiúnta. Thionscain an Coimisiún nósanna imeachta um shárú i gcoinne [na Beilge](#) agus [na Bulgáire](#) toisc gur thrasaigh siad na rialacha go mícheart.

Iompar glan

Is féidir leis an earnáil iompair an tAontas a bhrú i dtreo a chuspóra maidir le neodracht aeráide a bhaint amach. Ní mór do gach modh iompair a bheith níos inbhuanaithe. Ní mór modhanna malartacha glasa a bheith ar fáil agus ní mór na dreasachtaí cearta a chur i bhfeidhm chun an t-aistriú a chur chun cinn.

San earnáil bhóithre, leagtar síos sa [Treoir maidir le Feithiclí Glana](#) spriocanna náisiúnta maidir le soláthar poiblí feithiclí glana. Leagtar amach spriocanna sonracha do ghluaistéin agus do veaineanna, do leoraithe agus do bhusanna, lena n-áirítear cuspóir maidir le busanna astaíochtaí nialasacha. Chun a chinntiú go gcuirtear na rialacha sin i bhfeidhm i ngach Ballstát, shaothraigh an Coimisiún a nós imeachta i gcoinne [na Bulgáire](#), [na Seice](#), [na Cipire](#), [na hUngáire](#) agus [na Sualainne](#), nár ghlac na rialacha ina ndlí náisiúnta.



San earnáil mhuirí, tá an [Treoir maidir le saoráidí glactha calafoirt](#) deartha chun cosc a chur ar thruailliú farraige ó longa. Ceanglaítear léi nach gcaitear dramhaíl a ghintear ar bord loinge san fharraige ach go mbailítear í i gcalafoirt, a bhfuil orthu áiseanna iomchuí a chur ar fáil chun dramhaíl a bhailiú agus a phróiseáil. Ghlac an Coimisiún an chéad chéim eile sna nósanna imeachta i gcoinne [na Cipire](#), [na hÍsiltíre](#), [na hOstaire](#), [na Polainne](#) agus [na Sualainne](#) toisc nár thrasuigh siad na rialacha sin.

Talmhaíocht inbhuanaithe lena gcinntítear an soláthar bia



Cinntíonn [comhbheartas talmhaíochta an Aontais](#) an soláthar bia san Aontas, cobhsaíonn sé na margaí agus cabhraíonn sé le feirmeoirí ioncam cóir a fháil. Chomh maith leis sin, cuidíonn an beartas dul i ngleic le dúshlán chomhshaoil, an t-athrú aeráide agus cailliúint na bithéagsúlachta cuir i gcás.

Chuir iarmhairtí fhogha míleata na Rúise i gcoinne na hÚcráine brú ar shlabhra soláthair an Aontais, agus ar shlándáil an tsoláthair dhomhanda bia. Le comheagrú mhargaí an

Aontais maidir le táirgí talmhaíochta treisíodh freagra an Aontais ar an mbagairt sin. Chinntigh ár gcórasagraibhia athléimneach éifeachtúil go raibh bia sábháilte, inacmhainne agus ar ardchaighdeán ar fáil i ngach Ballstát. Ghníomhaigh an Coimisiún go láidir le nach mbainfí an bonn den chómhargadh talmhaíochta.

Thug an Ungáir scéim réamhfhógra isteach le haghaidh onnmhairí gránach ionas go raibh údarais na hUngáire in ann díolacháin a réamhchosc nó gránaigh a cheannach sula ndearnadh iad a onnmhairiú. Mheas an Coimisiún go raibh an scéim sin ar neamhréir le rialacha an Aontais maidir le comheagrú na margaí talmhaíochta agus maidir le comhrialacha le haghaidh onnmhairí. Dá bhrí sin, thionscain an Coimisiún nós imeachta um shárú i gcoinne [na hUngáire](#).

Lean an Coimisiún de chur i bhfeidhm ceart na rialacha maidir le [tacaíocht airgeadais d'fheirmeoirí is infheidhme in 2022](#) a chinntiú chomh maith le reachtaíocht eile a bhaineann le rialacha an chomhbheartais talmhaíochta, amhail reachtaíocht maidir le i) [feirmeoireacht orgánach](#), ii) [tásca geografacha a chosaint](#) agus iii) [cleachtais éagóracha trádála i slabhra an tsoláthair talmhaíochta agus bia a chosc](#). Chuir an Coimisiún clabhsúr ar chásanna um shárú i gcoinne 11 Bhallstát toisc go bhfuil na rialacha sin ionchorpraithe go hiomlán sa dlí náisiúnta acu chun cleachtais éagóracha trádála a sheachaint. Shainaithin an Coimisiún, áfach, cásanna de thrasuí mícheart; chun aghaidh a thabhairt orthu go tapa, thionscain an Coimisiún nósanna imeachta réamhsháraithe (EU Pilot) le 16 Bhallstát.

lascaigh inbhuanaithe agus pleanáil spásúil mhuirí

Is iad príomhchuspóirí [chomhbheartas iascaigh an Aontais](#) a chinntiú go bhfuil iascaireacht agus dobharshaothrú inbhuanaithe agus go gcuireann siad le forbairt shocheacnamaíoch na bpobal cósta agus le hinfhaighteacht soláthairtí bia. Tá sé ag croílár an bheartais stoic éisc a thabhairt chuig leibhéil shláintiúla agus iad a chothabháil. Sin é an fáth go gcuireann rialacha an Aontais srian ar acmhainneacht na gcabhlach agus go gcuireann siad teorainn ar ghabhálacha agus ar ghníomhaíochtaí iascaireachta. Chun a chinntiú go gcuirfear na rialacha sin chun feidhme ina n-iomláine, ní mór do na Ballstáit córais iomchuí rialaithe agus forfheidhmithe a chur i bhfeidhm.

Dá bhrí sin, díríonn an Coimisiún a ghníomhaíocht forfheidhmithe ar sheiceáil a dhéanamh go gcuirtear na rialacha i bhfeidhm ag na Ballstáit. Bhí na hoibleagáidí maidir le gabhálacha a mheá, a thaifeadadh agus a thuairisciú go cruinn lárnach ina ghníomhaíocht. Tá taifeadadh cruinn ar ghabhálacha ina bhonn le bainistíocht éifeachtach iascaigh, le ró-iascaireacht a chosc agus le gabhálacha de thaisme a laghdú. Tá sé rithábachtach córais smachtbhannaí iomchuí agus córas comhchuibhithe a bheith ann chun sonraí iascaigh a roinnt idir na Ballstáit agus leis an gCoimisiún. Reáchtáil an Coimisiún idirphlé réamhsháraithe (EU Pilot) leis na Ballstáit chun aghaidh a thabhairt ar fhadhbanna a sainaithníodh ina leith sin.



Lean an Coimisiún d'fhaireachán a dhéanamh ar an gcaoi a raibh an [Treoir maidir le Pleanáil Spásúil Mhuirí](#) á cur i bhfeidhm, go háirithe an oibleagáid pleananna spásúla muirí a dhréachtú. Dearadh an oibleagáid sin chun forbairt inbhuanaithe agus úsáid limistéar agus acmhainní muirí a chur chun cinn. Bíonn pleananna spásúla muirí ina n-uirlis riachtanach chun úsáid fuinnimh in-athnuaite amach ón gcósta a éascú chomh maith. Chuir an Coimisiún tús le himeachtaí um shárú i gcoinne [na Bulgáire](#) agus [na Spáinne](#), toisc nach raibh pleananna den sórt sin i bhfeidhm acu.

Ní mór do Bhallstáit rialú a dhéanamh freisin ar ghníomhaíochtaí iascaireachta shoithí an Aontais lasmuigh d'uiscí an Aontais agus a chinntiú go gcomhlíontar rialacha an chomhbheartais iascaigh. Ina theannta sin, lean an Coimisiún de nós imeachta um shárú i gcoinne [na Fraince](#) toisc gur mhainnigh sí cuid dá cabhlach sheachtrach a rialú go leordhóthanach.

Lean an Coimisiún le dhá shárú oscailte i gcoinne [na Beilge](#) agus [na hÍsiltíre](#) toisc nach ndearna na tíortha sin meá agus clárú cruinn a ngabhálacha a rialú agus a fhorfheidhmiú. Chuir an Coimisiún tús le nós imeachta um shárú i gcoinne [na Cróite](#) chomh maith chun obair leantach a dhéanamh maidir le heasnamh shainaitheanta ina córas rialaithe le haghaidh feirmeacha tuinníní gorma. Chuir sé clabhsúr ar chás i gcoinne Mhálta maidir le tuinníní gorma freisin de réir mar a thug údaráis Mhálta aghaidh ar na heasnamh a sainaithníodh.

Sláinte agus sábháilteacht bia



Tá sé mar aidhm ag rialacha an Aontais um shláinte agus sábháilteacht bia ardleibhéal cosanta a chinntiú maidir le sláinte an duine, ainmhithe agus plandaí, mar chosaint ar leasanna tomhaltóirí. Trí shláinte an duine, ainmhithe agus an chomhshaoil, chomh maith le sábháilteacht bia agus beatha, a chomhtháthú, glacann an Coimisiún cur chuige ‘Aon Sláinte Amháin’ maidir le hullmhacht agus cosc.

Ina theannta sin, chun sláinte an duine a chosaint agus chun cur le córas bia inbhuanaithe, cuidíonn an Coimisiún le Ballstáit reachtaíocht a fhorfheidhmiú, mar shampla, ar tháirgí a chuirtear ar mhargadh an Aontais agus a bhíonn i dteagmháil le bia.

Idir Bealtaine 2021 agus Aibreán 2022, d'oibrigh an Coimisiún agus na Ballstáit le chéile chun líon suntasach táirgí cistine agus earraí boird neamhshábháilte a bhaint de mhargadh an Aontais. Dhírigh an gníomh forfheidhmithe comhpháirteach sin, ar a dtugtar ‘[Bamboo-zling](#)’, ar earraí plaisteacha ina bhfuil bambú, a allmhairítear go minic chuig an Aontas ó thíortha nach Ballstáit den Aontas iad. D'fhéadfadh na táirgí sin, a chuirtear i láthair go míthreorach mar tháirgí nádúrtha nó inbhuanaithe, aistriú substaintí is cúis le hailse a spreagadh ar leibhéal a sháraíonn teorainneacha faoi [rialacha AE](#). Baineadh go leor táirgí mídhleathacha agus calaoiseacha dá leithéid sin ón margadh.

Cosc a chur le galair a bhaineann le tobac

Tá caitheamh tobac fós mar phríomhchúis le hailse inchoiscthe, agus cuirtear 27% de na cásanna ailse go léir ina leith. Tá sé mar aidhm ag an [Treoir um Tháirgí Tobac](#) feidhmiú an mhargaidh inmheánaigh do thobac agus do tháirgí gaolmhara a fheabhsú, agus ardleibhéal cosanta sláinte do dhaoine á chinntiú san am céanna. Gineann sé torthaí dearfacha don tsláinte phoiblí. In 2022, lean an Coimisiún dá chuid oibre chun an Treoir a fhorfheidhmiú go hiomlán, ag tacú le cur chun feidhme [Plean Sáraithe Ailse na hEorpa](#). Rinneadh measúnú breise maidir le cé acu an ndearnadh an Treoir a thrasú sna dlíthe náisiúnta go ceart nó nach ndearnadh. Bhí an t-idirphlé leis na Ballstáit lárnach maidir le cur i bhfeidhm na Treorach agus a gníomhartha cur chun feidhme a fheabhsú chomh maith.

Iompar níos sábháilte

Is é an t-iompar ar bóthar an modh taistil is mó úsáid i measc mhuintir na hEorpa agus is príomhchúis le timpistí é. Is ardtosaíocht don Choimisiún é timpeallacht a chruthú a chothaíonn iompar sábháilte ar bóthar. Cuidíonn forfheidhmiú rialacha agus caighdeáin theicniúla an Aontais le líon na mbásanna de bharr timpistí bóthair a laghdú.



In 2022, lean an Coimisiún de nós imeachta um shárú i gcoinne [na Seice](#) toisc nár thrasuigh sí go ceart [rialacha](#) an Aontais maidir leis na híoschaighdeáin infheidhmeachta maidir le tiomáint agus riochtaí cardashoithíocha. Lean sé freisin de nósanna imeachta um shárú i gcoinne [na Gréige](#), [na hÍsiltíre](#), [na Polainne](#), [na Portaingéile](#), [na Slóvaice](#) agus [na Slóivéine](#) toisc nár thrasuigh na tíortha sin [dlí an Aontais](#) maidir le bainistiú sábháilteachta an bhonneagair bóthair ina iomláine.

San earnáil iarnróid, ghlac an Coimisiún an chéad chéim eile sna nósanna imeachta um shárú i gcoinne na Sualainne maidir lena mainneachtain fógra a thabhairt don Choimisiún faoi bhearta trasuite maidir leis na rialacha idir-inoibritheachta iarnróid agus sábháilteachta iarnróid. Tá na rialacha sin mar chuid den Cheathrú Pacáiste Iarnróid, ar tosaíocht don Choimisiún é a chur i bhfeidhm. Maidir le sábháilteacht eitlíochta, chuir an Coimisiún tús le nós imeachta um shárú i gcoinne [na Spáinne](#) as reachtaíocht an Aontais maidir le [heitlíocht shibhialta](#) agus [aerchríú eitlíochta sibhialta](#) a chur i bhfeidhm go mícheart.

San earnáil mhuirí, lean an Coimisiún de bheith ag díriú ar fhorfheidhmiú [rialacha an Aontais maidir leis an íosleibhéal oiliúna do mharaithe](#). Go háirithe, ghlac sé céimeanna breise sna nósanna imeachta um shárú i gcoinne [na Seice](#) agus [na Cipire](#) chun a chinntiú go gcuirfidh siad na rialacha sin chun feidhme.

Eoraip atá oiriúnach don Aois Dhigiteach

‘Tá rialacha soiléire de dhíth ar an aistriú digiteach. Ní mór go mbeadh a fhios ag daoine gur féidir leo muinín a chur sa teicneolaíocht atá ina lámha acu. Tá intuarthacht de dhíth ar ghnólachtaí chun a n-infheistíochtaí a phleanáil. Agus is é sin go díreach an fáth gur tháinig muid suas leis an gclár oibre is uailmhianaí maidir le hathchóirithe digiteacha agus infheistíocht i stair an Aontais.’

An tUachtarán von der Leyen, ina hóráid ag an imeacht ‘Máistrí na Digiteachta 2022’



Tá rún daingean ag an gCoimisiún ‘Deacáid Dhigiteach’ na hEorpa a dhéanamh as an deacáid seo. Tá an tAontas meáite ar chaighdeán dhigiteacha a leagan síos, le béim shoiléir ar shonraí, ar theicneolaíocht agus ar bhonneagar. Chun bheith ar thús cadhnaíochta sa rás domhanda maidir le teicneolaíocht iontaofa, shlán agus dhaonlárnach, ní mór do na Ballstáit rialacha comhaontaithe le chéile a chur chun feidhme go hiomlán agus go tapa. Dá bhrí sin, rinne an Coimisiún gníomh pras i gcoinne aon trasuí déanach ar rialacha nua. Ghníomhaigh sé go daingean chun cearta bunúsacha daoine aonair a chosaint chomh maith.

Teicneolaíocht a oibríonn do na daoine

Is bloc tógála lárnach den Mhargadh Aonair Digiteach é an [Cód um Chumarsáid Leictreonach Eorpach 2020](#), toisc go gcuireann sé le nascacht agus go gcosnaíonn sé tomhaltóirí ar fud na hEorpa ar bhealach níos fearr. Leis sin, déantar conarthaí níos soiléire, cáilíocht seirbhísí agus margáí iomaíocha a chinntiú.

I mí Aibreáin 2022, chinn an Coimisiún [10 mBallstát](#) a tharchur chuig an gCúirt Bhreithiúnais toisc gur mhaínnigh siad an Cód a thasú go hiomlán sa dlí náisiúnta. Ag an am céanna, le linn 2022, chuir an Coimisiún clabhsúr ar nósanna imeachta um shárú i gcoinne ocht mBallstát toisc go raibh trasuí curtha i gcrích acu. Faoi dheireadh, ní ach Éire, an Laitvia, an Pholainn, an Phortaingéil agus an tSlóivéin nár thug fógra faoi bhearta trasuite agus tarchuireadh chuig an gCúirt iad agus iarradh smachtbhannaí airgeadais a fhorchur orthu.

Geilleagar digiteach atá cóir agus iomaíoch

Leis an [Treoir maidir le cóipcheart sa Mhargadh Aonair Digiteach](#) agus an [Treoir maidir le clár theilifíse agus raidió ar líne](#), déantar nuachóiriú ar rialacha cóipchirt an Aontais do thomhaltóirí agus do chruthaitheoirí, ionas gur féidir leo an leas is fearr a bhaint as an domhan digiteach. Cosnaíonn siad sealbhóirí ceart, lena spreagtar cruthú agus scaipeadh níos mó ábhar ardluacha. Tugann siad rogha níos leithne ábhair d'úsáideoirí trí chostais idirbheart a ísliú agus trí dháileadh clár raidió agus teilifíse a éascú ar fud an Aontais.

Lean an Coimisiún de nósanna imeachta um shárú i gcoinne [14 Bhallstát](#) toisc nár thrasuigh siad an Treoir maidir le cóipcheart sa Mhargadh Aonair Digiteach agus i gcoinne [11 Bhallstát](#) toisc nár thrasuigh siadsan an Treoir maidir le clár theilifíse agus raidió ar líne.

I gcás a thionscain an Pholainn i gcoinne Pharlaimint na hEorpa agus na Comhairle, [dheimhnigh](#) Cúirt Bhreithiúnais an Aontais Eorpaigh bailíocht Airteagal 17 den Treoir maidir le Cóipcheart. Cuireann an t-airteagal sin cosc ar ardáin ábhar neamhcheadúnaithe faoi chóipcheart a thaispeáint thar ceann a n-úsáideoirí. Dá bhrí sin, ceanglaítear ar na Ballstáit an t-airteagal a chur chun feidhme sa dlí náisiúnta.

An geilleagar sonraí a chur chun cinn

Tá sé mar aidhm ag an [Treoir maidir le Sonraí Oscailte](#) níos mó de na sonraí a tháirgeann agus a mhaoiníonn an earnáil phoiblí a chur ar fáil lena n-athúsáid ag duine ar bith chun aon chríche nua. Leis an Treoir, spreagtar forbairt nuálaíochtaí a bhaineann go láidir le sonraí, ar nós aipeanna aimsire nó soghluaisteachta. Ina theannta sin, feabhsaítear trédhearcacht trí rochtain a chur ar fáil ar shonraí taighde arna gcistiú go poiblí, agus tugtar tacaíocht do theicneolaíochtaí nua, an intleacht shaorga san áireamh.

In 2022, ghlac an Coimisiún an chéad chéim eile sna nósanna imeachta um shárú i gcoinne [12 Bhallstát](#) toisc gur mhaínnigh siad an Treoir a thrasú sa dlí náisiúnta. Ag an am céanna, cuireadh clabhsúr ar imeachtaí um shárú i gcoinne ocht mBallstát toisc gur thug siad fógra don Choimisiún gur trasúodh an Treoir ina hiomláine.

Sochaí dhigiteach atá oscailte, daonlathach agus inbhuanaithe

Leis an [Treoir athbhreithnithe maidir le Seirbhísí Meán Closamhairc](#), rialaítear comhordú na meán closamhairc go léir, idir ghnáthchraoltaí teilifíse agus seirbhísí ar éileamh, ar fud an Aontais. Is é is aidhm do rialacha na Treorach sin creat rialála a bhunú a bheidh oiriúnach don ré dhigiteach, as a dtiocfaidh réimse closamhairc atá níos sábháilte, níos córa agus níos ilghnéithí.

Lean an Coimisiún den Treoir a fhorfheidhmiú mar ábhar tosaíochta in 2022. Bhí sé in ann cásanna i gcoinne seacht mBallstát a dhúnadh agus an Treoir á trasú acu. Níorbh amhlaidh an cás i gcás [na hÉireann](#), áfach, agus b'éigean don Choimisiún an tír sin a tharchur chuig an gCúirt Bhreithiúnais.



Tá sé i gcoilár iolrachas na meán ionas gur féidir le soláthraithe seirbhíse na meán oibriú faoi shaoirse agus go neamhspleách i ngach áit san Aontas Eorpach. Leagtar amach i [rialacha teileachumarsáide AE](#) nach mór do sholáthraithe seirbhíse na meán a bheith in ann rochtain a fháil ar an margadh faoi théarmaí neamh-idirdhealaitheacha, a bhfuil údar oibiachtúil leo agus atá comhréireach, agus faoi choinníollacha atá ar eolas roimh ré.

Chinn an Coimisiún [an Ungáir](#) a tharchur chuig an gCúirt Bhreithiúnais maidir leis an gcaoí a sannann sí cearta speictrim raidió. Bhreithnigh an Coimisiún go raibh cinneadh Chomhairle Meán na hUngáire, a dhiúltaigh do chearta stáisiúin raidió a athnuachan, díreireach agus neamh-thrédhearcach agus dá bhrí sin tá dlí an Aontais á shárú aici. D'áitigh an Coimisiún freisin gur sháraigh an Ungáir, trína hiompar, an tsaoirse cainte mar atá cumhdaithe i gCairt um Chearta Bunúsacha an Aontais.

Cosaint do thomhaltóirí agus do chuideachtaí

Foráiltear le rialacha an Aontais d'ardleibhéal cosanta do thomhaltóirí, agus earraí, ábhar digiteach agus seirbhísí digiteacha á gceannach acu laistigh den mhargadh aonair.

Leis an [Treoir maidir le Forfheidhmiú agus Nuachóiriú Níos Fearr](#) neartaíodh na rialacha atá ann cheana. Mhéadaigh sí an leibhéal trédhearcachta sa timpeallacht dhigiteach agus i bhfógraí maidir le laghdú praghsanna. Chuir sí le pionóis agus réitigh i gcás sárúithe ar dhlíthe tomhaltais chomh maith. Leis na rialacha nua méadaítear ar an deimhneacht dhlíthiúil atá ag tomhaltóirí agus trádálaithe araon. Thionscain an Coimisiún nósanna imeachta um shárú i gcoinne 22 Bhallstát toisc nár thrasuigh siad an Treoir in am. Féadadh ocht gcinn de na cásanna sin a dhúnadh níos déanaí in 2022.



Baineann an [Treoir maidir le hÁbhar Digiteach](#) agus an [Treoir maidir le Díol Earraí](#) le conarthaí tomhaltóirí a tugadh i gcách ón 1 Eanáir 2022. In 2022, ghlac an Coimisiún an chéad chéim eile sna nósanna imeachta um shárú i gcoinne [na Polainne](#), [na Slóivéine](#) agus [na Slóvaice](#) toisc nach ndearnadh reachtaíocht náisiúnta as na rialacha AE sin ina n-iomláine. Mar thoradh ar ghníomhaíochtaí forfheidhmiúcháin an Choimisiúin, bhí fógra tugtha ag na Ballstáit

uile, seachas an tSlóvaic, maidir le trasú iomlán na rialacha sin faoi dheireadh 2022. Chuir sé sin feabhas ar chosaint do thomhaltóirí, agus earraí nó ábhar digiteach á gceannach acu ó aon Bhallstát, agus mhéadaigh sé an deimhneacht dhlíthiúil do ghnólachtaí.

Táirgí, seirbhísí agus suíomhanna gréasáin inrochtana

Leis an [Ionstraim Eorpach um Inrochtaineacht](#), féachtar le rialacha comhchoiteanna a bhunú maidir le táirgí agus seirbhísí inrochtana san Aontas, agus laghdúithe costais mar thoradh air sin. Bainfidh daoine faoi mhíchumas agus seanóirí tairbhe as táirgí agus seirbhísí níos inrochtana ar an margadh.

Chuir an Coimisiún tús le [24 nós imeachta um shárú](#) toisc nár thrasuigh na Ballstáit na rialacha sin faoin spriocdháta. Lean an Coimisiún ar aghaidh tacaíocht a thabhairt do na Ballstáit maidir lena n-iarrachtaí an trasuí a thabhairt chun críche trí cheardlanna a eagrú le riaracháin náisiúnta.

Ceanglaítear leis an [Treoir maidir le hInrochtaineacht Gréasáin](#) ar shuíomhanna gréasáin agus ar fheidhmchláir mhóibíleacha de chuid comhlachtaí poiblí a bheith inrochtana do gach duine, lena n-áirítear daoine faoi mhíchumas agus seanóirí. Mar shampla, ní mór ráiteas inrochtaineachta a bheith ag na suíomhanna agus na feidhmchláir sin trína gcuirtear sonraí teagmhála ar fáil le haiseolais a thabhairt agus gearáin a dhéanamh i gcás ábhar dorochtana.

D'fhoilsigh an Coimisiún a [mheasúnú](#) ar thionchar agus ar chur chun feidhme na Treorach, agus san áireamh sa mheasúnú sin tá achoimrí atá [éasca le léamh](#). Taispeánann na torthaí gur dearadh an Treoir agus gur cuireadh i bhfeidhm go héifeachtúil í, sin agus gur fheabhsaigh an Treoir rochtain ar sheirbhísí poiblí ar líne agus ar fhaisnéis laistigh den Aontas Eorpach, rud a chuir leis an gcuimsiú sóisialta agus digiteach. Léirigh na torthaí freisin go bhfuil dul chun cinn praiticiúil fós le déanamh maidir le gach suíomh gréasáin agus feidhmchlár móibíleach san earnáil phoiblí le go mbeidh siad go hiomlán inrochtana do dhaoine faoi mhíchumas agus do dhaoine aosta.

Ligean do mhéadú ar fhás an mhargaidh aonair

Tá cur i bhfeidhm mícheart nó neamhiomlán rialacha an Aontais fós ina chúis le bacainní laistigh den mhargadh aonair. Ciallaíonn sé sin costais do ghnólachtaí agus do thomhaltóirí araon. Nuair a chuirtear na rialacha i bhfeidhm go mícheart, cruthaítear castacht agus ualaí riaracháin agus cuirtear an iomaíocht as a riocht, rud a bhaineann an bonn de chothrom na Féinne do ghnólachtaí ar fud an Aontais.

Chomh maith leis sin, dhírigh an ghníomhaíocht forfheidhmiúcháin ar na réimsí trasnaí siúd a bhfuil sé de chumas acu infheistiú a éascú chun dlús a chur leis an téarnamh ar fud éiceachórais eacnamaíocha éagsúla, amháin i réimse na seirbhísí, lena n-áirítear gairmeacha, saorghluaiseacht earraí agus soláthar poiblí.



Lean an Coimisiún ar aghaidh lena chuid iarrachtaí forfheidhmithe freisin ionas go n-íocfaidh údarais phoiblí in am as na hearraí agus na seirbhísí a fhaigheann siad, agus moilleanna cascáideacha ar íocaíochtaí feadh an tslabhra soláthair á seachaint, go háirithe in earnáil na sláinte. Déanann an Coimisiún faireachán réamhghníomhach ar dhul chun cinn na Beilge, na Gréige, na Spáinne, na hIodáile, na Portaingéile agus na Slóvaice, nach gcomhlíonann spriocanna na [Treorach maidir le hÍocaíochtaí Déanachago](#) fóill.

Chun a chinntiú go n-íocfaidh údaráis phoiblí in am as na hearraí agus na seirbhísí a fhaigheann siad, ghníomhaigh an Coimisiún go láidir i gcoinne dhá Bhallstát: lean sé de nós imeachta um shárú i gcoinne [na Gréige](#) maidir le heasnamh leanúnacha in earnáil na sláinte. Agus d'iarr sé ar an Iodáil cloí le [breithiúnas](#) na Cúirte Breithiúnais a dheimhnigh gur sháraigh an Iodáil ar dhlí an Aontais trí íocaíochtaí déanacha. Tar éis iarrachtaí a dhéanamh a nós imeachta fíorúcháin a ailíniú leis an Treoir maidir le hÍocaíochtaí Déanacha, chuir an Coimisiún clabhsúr ar nós imeachta um shárú eile i gcoinne na hIodáile.

D'fhan an Coimisiún ar an airdeall freisin chun cur i gcoinne srianta ar onnmhairiú, arna gcur i bhfeidhm ag na Ballstáit, i ndiaidh ionradh na hÚcráine. Mar gheall ar an ngníomhaíocht forfheidhmiúcháin ghasa agus láidir a rinne an Coimisiún, lean an margadh aonair ar aghaidh ag feidhmiú.

Ghlac an Coimisiún an chéad chéim eile sa nós imeachta i gcoinne [na hUngáire](#) as onnmhairiú ábhar tógála a theorannú. Thionscain an Coimisiún nós imeachta eile i gcoinne [na hUngáire](#) freisin toisc go ndearna sí praghsanna breosla níos airde a fhorchur ar fheithiclí a raibh uimhirphlátaí orthu nach den Ungáir iad i gcomparáid leis na feithiclí a bhí cláraithe san Ungáir. Ag deireadh 2022, chuir an Ungáir deireadh leis an sárú sin.

Faisnéis thrédhearcach faoi ghnólachtaí agus do ghnólachtaí

Ós rud é go bhfuil méadú ar líon na ngnólachtaí atá i mbun gnó thar theorainneacha idirnáisiúnta, tá sé rithábachtach rochtain éasca a bheith acu ar fhaisnéis faoi chuideachtaí i mBallstáit éagsúla. Faoi [reachtaíocht an Aontais](#) ceanglaítear ar na Ballstáit a gcláir náisiúnta tráchtála a nascadh le córas idirnasctha na gclár gnó (BRIS). Dá bharr sin, déantar oibríochtaí trasteorann a éascú, agus bíonn nósanna imeachta níos saoire agus níos gasta do chuideachtaí. Cuireann an ceanglas sin ar a gcumas do dhaoine aonair, do ghnólachtaí agus d'fhiontraithe faisnéis a fháil faoi chuideachtaí. Thug [rialacha an Aontais](#) uirlisí agus próisis dhigiteacha isteach i ndlí na gcuideachtaí chomh maith. Anois is féidir le fiontraithe cuideachtaí faoi dhliteanas teoranta a chruthú ar líne.




In 2022, chuir an Coimisiún tús le nósanna imeachta um shárú i gcoinne 10 mBallstát toisc nár thrasuigh siad an [Treoir maidir le Digitiú Dhlí na gCuideachtaí](#) ina ndlí náisiúnta in am. Mar thoradh ar ghníomhaíocht fhorfheidhmithe ghasa an Choimisiúin maidir leis na cásanna sin agus cásanna eile, cuireadh trasuí na rialacha i gcrích i 19 mBallstát faoi dheireadh 2022. Chuir an Coimisiún clabhsúr ar nós imeachta um shárú i gcoinne na Bulgáire chomh maith toisc go ndearna an tír sin a clár gnó a cheangal le córas idirnasctha na gclár gnó (BRIS).

Córais iompair dhigitigh

Leis an digitiú, is féidir an t-iompar a dhéanamh níos sábháilte, níos éifeachtúla agus níos inbhuanaithe. Fágann teicneolaíochtaí faisnéise agus cumarsáide go mbíonn deiseanna nua le tapú i leith gach modha iompair paisinéirí agus lasta. Ina theannta sin, is féidir seirbhísí nua a chruthú trí theicneolaíochtaí atá ann cheana a chomhtháthú le teicneolaíochtaí nua.

Mar shampla, i gcás iompar ar bóthar, le [Seirbhís Dola Leictreonaigh na hEorpa](#) cinntítear go bhfuil seirbhísí dolaí idir-inoibritheach ar fud bhóithre an Aontais Eorpaigh. Baineann úsáideoirí bóithre tairbhe as toisc gur féidir leo dolaí a íoc ar fud an Aontais gan ach conradh síntiúis amháin le soláthraí seirbhíse amháin agus aonad ar bord amháin. Chuir an Coimisiún an Treoir i bhfeidhm trí roinnt nósanna imeachta um shárú.



Maidir le sábháilteacht eitlíochta, is ionann [seirbhísí nasctha sonraí](#) agus teachtaireachtaí idir foireann aerárthaí agus foireann talún lena gcomhlánaítear an chumarsáid ghutha a úsáidtear de ghnáth i rialú aerthráchta. Chuir an Coimisiún clabhsúr ar a nósanna imeachta um shárú i gcoinne na Fraince agus na Cipire sa réimse seo. Baineann buntáistí sonracha don phobal le comhlíonadh na Treorach sin: de réir mar a mhéadaíonn an trácht ar chainéil chumarsáide gutha, déanann seirbhísí nasctha sonraí an chumarsáid idir píolótaí agus rialtóirí níos

éifeachtaí, agus ar an gcaoi sin freastalaítear ar an méadú ar leibhéil aerthráchta laistigh den Eoraip.

Maidir le ríomhbhailiúchán dolaí, chuir an Coimisiún tús le nósanna imeachta um shárú i gcoinne [na Gearmáine](#), [na hIodáile](#) agus [na Fionlainne](#) toisc nár thrasuigh siad rialacha an Aontais ina n-iomláine. Lean sé de chásanna um shárú eile i gcoinne [11 Bhallstát](#) sa réimse sin.

Maidir le seirbhísí nasctha sonraí, tharchuir an Coimisiún [an Ghréig](#), [Málta](#) agus [an tSlóvaic](#) chuig an gCúirt Bhreithiúnais toisc nár chuir siad na seirbhísí sin ar fáil agus i bhfeidhm d'aerárthaí a bhí ag eitilt laistigh den aerspás a raibh siad freagrach as.

Geilleagar a fhóireann do na daoine

‘Spreagann ár ngeilleagar sóisialta margaidh gach duine chun barr feabhais a bhaint amach, ach déanann sé cúram dár leochaileacht mar dhaoine freisin.’

An tUachtarán von der Leyen san Aitheasc a thug sí faoi Staid an Aontais in 2022



Ní éireoidh le daoine agus gnólachtaí san Aontas mura bhfóireann an geilleagar dóibh. Cuidíonn geilleagar sóisialta margaidh an Aontais le geilleagair eile fás agus dul i ngleic leis an mbochtaineacht agus leis an éagothroime san am céanna. Baineann cur chun feidhme neamhiomlán nó cur i bhfeidhm mícheart na rialacha a comhaontaíodh i gcoiteann an bonn d'acmhainneacht ár ngeilleagar agus cuirtear ualach ar fhiontair bheaga agus mheánmhéide dá bharr. Leis sin, tagann meath ar chearta na dtomhaltóirí agus na n-oibrithe chomh maith. Chuir an Coimisiún dlí an Aontais i bhfeidhm thar raon leathan beartas chun dul i ngleic leis na rioscaí sin.

Dálaí oibre

Tá dálaí córa oibre faoi dhínit ina gcuid lárnach de gheilleagar sóisialta margaidh na hEorpa. Ghlac an tAontas le híoschaighdeáin a bhfuil feidhm acu ar fud na mBallstát maidir le [ham oibre](#), [obair pháirtaimseartha](#) agus [obair ar théarma seasta](#), agus [obair ghníomhaireachta shealadach](#). In 2022, rinne an Coimisiún roinnt gníomhaíochtaí chun na rialacha sin a fhorfheidhmiú. Chuir sé tús le [cásanna um shárú i gcoinne 19 mBallstát](#) toisc nár thrasuigh siad [rialacha AE](#) in am trátha. Tar éis gearán a dhéanamh, rinne an Coimisiún gníomhaíocht i gcoinne [na hÉireann](#) freisin maidir le cearta oibrithe a fhorfheidhmiú faoin [Treoir maidir le Comhairle Fostaithe na hEorpa](#), arb é is aidhm di a chinntiú go bhfuil sé de cheart ag baill foirne atá ag obair do chuideachtaí i mbun gnó ar fud an Aontais eolas agus comhairliúchán a fháil maidir le saincheistanna trasnáisiúnta.



Sláinte agus sábháilteacht ag an obair

D'fhorbair an tAontas corpas fairsing rialacha maidir le sláinte agus sábháilteacht ag an obair chun ardleibhéal cosanta a chinntiú d'oibrithe. Bíonn an lucht saothair sláintiúil agus táirgiúil mar thoradh ar dhálaí oibre sláintiúla agus sábháilte. Dhírigh bearta forfheidhmithe an Choimisiúin ar rialacha sláinte agus sábháilteachta ceirde an Aontais a thrasú go tráthúil sa reachtaíocht náisiúnta. Chuir an Coimisiún clabhsúr ar 19 nós imeachta um shárú, toisc go raibh na treoracha ábhartha trasuite ag na Ballstáit. Bhain na rialacha sin le nuashonruithe ar an [Treoir maidir le Carcanaiginí agus Só-ghineacha](#), leis an [gCúigiú Liosta de Theorainnluachanna Tascacha Nochta Ceirde](#) agus le hoiriúnuithe teicniúla ar threoracha i réimsí an [trealamh chosanta phearsanta](#), [na n-oibreán bitheolaíoch](#), agus [na cóireála leighis ar bord soithí](#).

Chun bearta náisiúnta a thabhairt i gcomhréir leis an [gCeathrú Liosta de Theorainnluachanna Tascacha Nochta Ceirde](#) go tapa, lean an Coimisiún den phróiseas réamhsháraithe (EU Pilot) le 13 Bhallstát. A bhui leis an idirphlé sin, bhí dhá Bhallstát in ann comhréireacht leis an Treoir a bhaint amach in 2022. Tá gach Ballstát eile, seachas ceann amháin, i ndiaidh glacadh lena ndlíthe náisiúnta a chur i gcomhréir le rialacha an AE. Bhain an Coimisiún úsáid as an bpróiseas EU Pilot le 15 Bhallstát i dtaca le comhréireacht a dtrasuite ar an [Treoir nuashonraithe maidir le Carcanaiginí agus Só-ghineacha](#) ([Treoir 2017/2398](#)) chomh maith. Rinne dhá Bhallstát a rialacha a oiriúnú cheana féin ag deireadh 2022 chun a chinntiú go gcomhlíonnann siad an Treoir.

Soghluaisteacht an lucht saothair

Tá [saorghluaiseacht oibrithe ar](#) cheann de shaoirsí bunúsacha an Aontais. Ní hamháin go mbaineann sé leis an gceart obair a dhéanamh i mBallstát eile ach baineann sé freisin leis an gceart post a lorg i mBallstát eile agus cónaí sa Bhallstát sin chun na críche sin.



Tá sé de cheart ag saoránaigh AE cónaí i mBallstát eile ar feadh 3 mhí, agus is é an t-aon cheanglas atá orthu doiciméad aitheantais bailí a bheith ina seilbh acu. Tar éis trí mhí, ní mór do thíortha AE cead a thabhairt do chuardaitheoirí poist AE fanacht ar feadh tréimhse réasúnta ama tar éis dóibh clárú leis na seirbhísí fostaíochta. Ba cheart go gcuirfeadh sé sin ar a gcumas post a fháil a

fhreagraíonn dá gcáilíochtaí agus na bearta is gá a dhéanamh chun tosú ar an bpost. Nuair a bheidh an tréimhse réasúnta ama caite, féadfaidh na Ballstáit óstacha a cheangal ar chuardaitheoirí poist a chruthú go bhfuil fiordheiseanna acu post a fháil más mian leo fanacht níos faide.

Tar éis gearán ó shaoránach, chuir an Coimisiún tús le nós imeachta um shárú i gcoinne [na Beilge](#) ós rud é go n-éilíonn dlí na Beilge ar chuardaitheoirí poist AE a chruthú go bhfuil fíor-sheans acu post a fháil díreach tar éis na chéad trí mhí cónaithe sa Bheilg.

I gcás eile maidir le soghluaisteacht lucht saothair a thug gearánaigh os comhair an Choimisiúin, d'aontaigh [an Ghréig](#) a reachtaíocht a athrú tar éis nósanna imeachta um shárú de chuid an Choimisiúin, rud a thug deis do náisiúnaigh an Aontais rochtain a fháil ar phoist bhainistíochta ina Parlaimint.

Comhordú na gcóras slándála sóisialta

Comhordaítear faoi dhlí an Aontais córais slándála sóisialta náisiúnta na mBallstát chun a ráthú go ndéantar saorghluaiseacht daoine a fheidhmiú go héifeachtach. Cuidíonn sé le feabhas a chur ar chaighdeán cosanta slándála sóisialta na ndaoine a bhogann laistigh den Aontas.

An 16 Meitheamh 2022, dheimhnigh an [Chúirt](#) seasamh an Choimisiúin i nós imeachta um shárú i gcoinne [na hOstaire](#). Thug an Ostair innéacsú ar liúntais teaghlaigh isteach ina raibh foráil do mhéideanna éagsúla de na liúntais sin de réir áit chónaithe an linbh lena mbaineann laistigh den Aontas. Rialaigh an Chúirt go bhfuil an t-innéacsú sin in aghaidh dhlí an Aontais maidir le saorghluaiseacht lucht saothair agus comhordú na scéimeanna slándála sóisialta. Ina dhiaidh sin rinne an Ostair bearta chun an breithiúnas sin a chur i bhfeidhm. Chuir an Coimisiún tús le nós imeachta um shárú den chineál céanna i gcoinne [na Gearmáine](#) chomh maith.

Faisnéis agus cúnamh níos fearr do shaoránaigh agus do ghnólachtaí

In 2022, i bhfianaise iarmhairtí ionradh na Rúise ar an Úcráin, bhí sé níos tábhachtaí ná riamh go bhféadfadh daoine aonair agus gnólachtaí leanúint de bheith ag brath ar na deiseanna atá ar fáil sa mhargadh aonair. Is é comhar idir an Coimisiún agus na Ballstáit an bealach is tapúla chun aghaidh a thabhairt ar bhacainní ar shaorghluaiseacht. Cuireann uirlisí rialachais an mhargaidh aonair, amhail [An Eoraip Agatsa](#), [An Eoraip Agatsa – Comhairle](#) agus [SOLVIT](#), faisnéis shoiléir, cúnamh agus réitigh ar fhadhbanna ar fáil do shaoránaigh agus do ghnólachtaí.

Cuireann siad ar chumas na ndaoine aonair agus na ghnólachtaí araon lánúsáid a bhaint as a gcearta AE sa mhargadh aonair. Ina theannta sin, bíonn fianaise ó na huirlisí sin ina gcuidiú le haon fhadhbanna atá ann cheana a aithint agus a cheartú. In 2022, chabhraigh SOLVIT le níos mó ná 2 400 saoránach agus gnólacht trí aghaidh a thabhairt ar a gcuid fadhbanna. Chuaigh saoránaigh agus gnólachtaí i gcomhairle leis an Eoraip Agatsa – Comhairle beagnach 28 000 uair maidir lena gcearta sa mhargadh aonair.

Rialáil níos fearr ar ghairmeacha agus aitheantas níos fearr do cháilíochtaí



Leis an [Treoir maidir le Tástáil Chomhréireachta](#), cuirtear oibleagáid ar na Ballstáit a chinntiú go bhfuil aon cheanglais maidir le gairmeacha a thugann siad isteach nó a leasaíonn siad riachtanach agus cothrom. De bharr rialacha náisiúnta diana, bíonn sé níos deacra d'iarrthóirí cáilithe raon leathan gairmeacha a rochtain nó a chleachtadh. Ghlac an Coimisiún cinntí um shárú i ndáil le cúig Bhallstát chun trasuí iomlán agus ceart na rialacha a chinntiú.

Leis an [Treoir maidir le cáilíochtaí gairmiúla a aithint](#) tá sé níos fusa do ghairmithe seirbhísí a sholáthar ar fud na hEorpa, agus cosaint níos fearr do thomhaltóirí agus do shaoránaigh á ráthú ag an am céanna. Ghníomhaigh an Coimisiún go láidir i gcoinne na mBallstát inar leanadh de shárú na Treorach, lena n-áirítear trína dtarchur chuig an gCúirt Bhreithiúnais, nuair ba ghá. Bhí sé in ann cásanna i gcoinne na hIodáile, na hOstaire agus na Sualainne a dhúnadh, agus baineann gairmithe leas iomlán as na buntáistí sin sna tíortha sin anois.

Chinn an Coimisiún [an Bheilg](#) a tharchur chuig an gCúirt Bhreithiúnais toisc nár thrasuigh sí an Treoir maidir le Tástáil Chomhréireachta, agus chuir sé clabhsúr ar nósanna imeachta i gcoinne na Cipire agus na Laitvia. Mar sin féin, chinn an Coimisiún tús a chur le nósanna imeachta i gcoinne na [Cipire](#), [na Spáinne](#) agus [na Laitvia](#) toisc gur thrasuigh siad na rialacha sin go mícheart.

Maidir le haithint cáilíochtaí gairmiúla, tharchuir an Coimisiún [an Phortaingéil](#) agus [an tSlóvaic](#) chuig an gCúirt Bhreithiúnais. Baineann an chéad cheann den dá chás sin le saincheistean a tháinig chun cinn trí ghearán. Chuir an Coimisiún tús le cásanna i gcoinne [na Beilge](#), [na Gréige](#)

Féimheacht cuideachtaí inmharthana a chosc

Tá sé mar aidhm ag an [Treoir maidir le hathstruchtúrú](#) agus [dócmhainneacht](#) luathféimheacht a chosc agus timpeallacht a bhunú atá fóinteach do ghnólachtaí dócmhainneacha le go bhféadfaidís bheith ar a seanléim arís. Cuireann sí na coinníollacha ar fáil do chuideachtaí inmharthana, a bhfuil deacrachtaí airgeadais acu, chun athstruchtúrú a dhéanamh go luath. Cuireann na rialacha nua le héifeachtúlacht na nósanna imeachta dócmhainneachta agus cuireann siad úsáid modhanna leictreonacha cumarsáide chun cinn.



Thionscain an Coimisiún nósanna imeachta um shárú i gcoinne [10 mBallstát](#) toisc nár thrasuigh siad an Treoir.

Seirbhísí airgeadais

Tá seirbhísí airgeadais i gcroílár an mhargaidh aonair. Cinntíonn rialacha an Aontais go ndéantar idirghabhálaithe airgeadais agus margaí airgeadais a rialáil agus a mhaoirsiú i gceart, ar mhaithe le cobhsaíocht, iomaíochas agus trédhearcacht. Cumhdaíonn siad na príomhghníomhaithe sna margaí airgeadais, mar shampla bainc, árachóirí, gnólachtaí infheistíochta, bainisteoirí sócmhainní agus idirghabhálaithe airgeadais eile.

Thionscain an Coimisiún 37 nós imeachta um shárú i gcoinne na mBallstát nach ndearna na treoracha éagsúla maidir le hidirghabhálaithe airgeadais a thrasuí ina n-iomláine, eadhon iad siúd a bhaineann leis an méid seo a leanas:

- [téarnamh an mhargaidh caipitil](#)
- [inbhuanaitheacht á breithniú](#) maidir le hionstraimí airgeadais agus cistí infheistíochta
- [doiciméid thábhachtacha faisnéise](#) le haghaidh gnólachtaí comhinfeistíochta

Lean an Coimisiún de naoi n-imeacht [breise um shárú](#) maidir le rialacha AE faoi [dháileadh trasteorann cistí](#), [ardáin sluachistithe](#) agus [iniúchtaí](#).

Le rialacha an Aontais a tugadh cothrom le dáta le déanaí, féachtar lena chinntiú go mbeidh na hidirghabhálaithe airgeadais sin níos athléimní fós agus go ndéanfar maoirseacht níos fearr orthu, chun cur lena gcumas dul i ngleic le héifeachtaí géarchéimeanna ar nós na paidéime nó an chogaidh san Úcráin. Tá sé mar aidhm ag na rialacha freisin tacú le fás eacnamaíoch agus brúnna ar an gcomhshaol a laghdú, agus an ghné shóisialta á cur san áireamh. Chuir an Coimisiún clabhsúr ar 26 nós imeachta um shárú tar éis do na Ballstáit treoracha éagsúla sa réimse a thrasuí go hiomlán.

Íocaíochtaí miondíola

Tá íocaíochtaí miondíola riachtanach do gheilleagar na hEorpa. Tá córais éifeachtúla íocaíochta miondíola riachtanach do dhea-reachtáil earnálacha éagsúla, lena n-áirítear díolacháin mhiondíola, íocaíochtaí gnólacht le gnólacht, íocaíocht as fónais agus cíos, etc. Is iad an [Treoir maidir le Seirbhísí Íocaíochta arna leasú](#) (PSD2) agus an [Rialachán SEPA](#) dhá cheann de dhlíthe an Aontais a mhúnlaíonn na rialacha maidir le córais íocaíochta miondíola.



Chuaigh an Coimisiún i mbun próiseas réamhsháraithe (EU Pilot) le 20 Ballstát maidir leis an dóigh ar thrasúigh siad PSD2. Lean sé freisin dá iarrachtaí forfheidhmithe leis na Ballstáit chun dul i ngleic le [hírdhealú IBAN](#); tarlaíonn idirdhealú den sórt sin nuair nach féidir cuntais i mBallstáit eile a úsáid chun íocaíochtaí de dhochar díreach a chur ar bun nó chun cistí a aistriú le haghaidh seirbhísí íocaíochtaí intíre, agus tá sé de shárú ar Rialachán SEPA.

Maoirseacht a dhéanamh ar chur i bhfeidhm rialacha seirbhísí airgeadais an Aontais ag údaráis náisiúnta

Cuireann dlí an Aontais ar chumas [na nÚdarás Maoirseachta Eorpach](#) ('ÚMEanna') imscrúdú a dhéanamh ar shárúithe féideartha nó ar neamhfheidhmiú dhlí an Aontais ag na húdaráis náisiúnta atá ag obair faoina maoirseacht. I gcás ina léiríonn na himscrúduithe gur mhainnigh údarás náisiúnta a ról maoirseachta a chur i gcrích go ceart, féadfaidh an ÚME ábhartha moltaí a dhéanamh chun aghaidh a thabhairt ar na heasnaimh arna sainaithint aige. Is é an Coimisiún a dhéanann faireachán ar an ngníomhaíocht arna déanamh ag an údarás maoirseachta náisiúnta chun aghaidh a thabhairt ar na heasnaimh sin, agus féadfaidh an Coimisiún tuairimí a eisiúint mura gcloítear le moltaí an ÚME. In 2022, ghlac an Coimisiún [tuairim fhoirmiúil](#) lenar gceanglaíodh ar údarás maoirseachta árachais na Slóvaice a oibleagáidí faoi chóras stuamachta AE

do chuideachtaí árachais agus atharachais san Aontas ([Sócmhainneacht II](#)) a chomhlíonadh go hiomlán. Tháinig an tuairim seo sna sála ar an moladh a d'eisigh an [tÚdarás Eorpach um Árachas agus Pinsin Cheirde sa bhliain chéanna](#).

Sciúradh airgid agus maoiniú na sceimhlitheoireachta

Trí dhul i ngleic le sciúradh airgid agus maoiniú na sceimhlitheoireachta, cuirtear leis an tslándáil agus cosnaítear sláine an chórais airgeadais idirnáisiúnta. Dá bhrí sin, tá cur chun feidhme éifeachtach rialacha an Aontais i gcoinne sciúradh airgid fós i gcroílár bheartas forfheidhmithe an Choimisiúin.



Tá sé rithabhachtach an trédhearcacht a fheabhsú chun troid i gcoinne mí-úsáid cuideachtaí le sciúradh airgid a cheilt. Dá bhrí sin, ní mór do na Ballstáit a chinntiú go stóráiltear faisnéis faoi fhíorúinéirí na gcuideachtaí sin, na 'húinéirí tairbhiúla', i gclár lárnach. Cuireann córas nochta cruinn, atá trédhearcach maidir le húinéireacht thairbhiúil agus struchtúir rialaithe gnólaachtaí, le muinín infheisteoirí agus an phobail i gcoitinne sna margáí airgeadais.

Chun rialacha an Aontais maidir le clárú úinéireachta tairbhiúla a fhorfheidhmiú, thionscain an Coimisiún próiseas réamhsháraithe (EU Pilot) leis na Ballstáit go léir. Chuir sé tús freisin le nósanna imeachta um shárú i gcoinne [na Spáinne](#), [na hIodáile](#), agus [na Laitvia](#) mar gheall ar neamh-thrasú, neamh-chomhréireacht agus cur i bhfeidhm mícheart na rialacha maidir le clárú úinéireachta tairbhiúla. Ag an am céanna, bhí an Coimisiún in ann 11 nós imeachta um shárú a dhúnadh, toisc go raibh trasú an [5^ú Treoir maidir leis an Sciúradh Airgid a Chomhrac](#) curtha i gcrích ag na Ballstáit lena mbaineann, lena n-áirítear rialacha maidir le clárú úinéireachta tairbhiúla.

Déanann [rialacha an Aontais](#) sciúradh airgid a choiriúlú nuair a dhéantar d'aon ghnó é agus nuair is eol gur tháinig na sócmhainní atá i gceist as gníomhaíocht choiriúil. Éascaíonn siad comhar póilíneachta agus breithiúnach idir tíortha an Aontais agus cuireann siad cosc ar choirpigh leas a bhaint as córais dlí atá níos trócairí. Chuir an Coimisiún na rialacha sin i bhfeidhm trí leanúint de chás i gcoinne [na Beilge](#), agus trí chásanna a thionscnamh i gcoinne [na Liotuáine](#), [na Laitvia](#), [Mhálta](#) agus [na Portaingéile](#) toisc nár ghlac siad na rialacha sa reachtaíocht náisiúnta.

Soghluaisteacht agus iompar

Cinntíonn [rialacha nua](#) d'earnáil iompair ar bóthar an Aontais cothromaíocht idir cosaint shóisialta do thiománaithe agus saoirse d'oibreoirí seirbhísí iompair trasteorann a sholáthar. Rialaíonn dlí an Aontais maidir le [postú tiománaithe](#) cásanna ina seolann fostóir a thiománaithe chun seirbhís a dhéanamh i mBallstát eile ar bhonn sealadach. Leis na rialacha sin, cinnítear go bhfaighidh tiománaithe ar postú luach saothair an Bhallstáit óstaigh don tréimhse ina ndéantar iad a phostú. Déanann siad bearta cigireachta a ailíniú ar fud an Aontais freisin.

Ós rud é nár thrasuigh roinnt Ballstát na rialacha sin fós, lean an Coimisiún de chásanna um shárú i gcoinne [ocht mBallstát](#) ionas gur féidir le tiománaithe ar postú leas a bhaint as na buntáistí

a luaithe is féidir. Lean an Coimisiún de nósanna imeachta um shárú i gcoinne [na Gréige](#) freisin toisc nár chomhlíon sí rialacha an Aontais maidir le [seiceálacha cois bóthair](#), agus i gcoinne [na Danmhairge](#) toisc nár chomhlíon an tír sin [rialacha cabatáiste](#) maidir le hiompar paisinéirí ar bhus agus ar chóiste.

Maidir le hiompar muirí, lean an Coimisiún de nós imeachta um shárú i gcoinne [na Portaingéile](#) mar gheall ar chur i bhfeidhm mícheart rialacha sábháilteachta agus comhshaoil an Aontais maidir le [trealamh muirí](#). Ina theannta sin, tar éis gearán a bhain le saorghluaiseacht oibrithe agus saoirse chun seirbhísí a sholáthar san earnáil mhuirí, d'iarr an Coimisiún ar [Mhálta](#) dlí an Aontais a chur i bhfeidhm i gceart maidir lena chóras oibrithe calafoirt.

Is rogha malartach iomaíoch é iompar ar uiscebhealaí intíre seachas iompar ar bóthar agus iarnród. Cuidíonn sé freisin le trácht a laghdú ar líonraí bóithre a bhfuil an iomarca tráchta orthu i réigiúin dlúthdhaonra. D'fhorfheidhmigh an Coimisiún rialacha AE sa réimse sin trí nósanna imeachta um shárú a leanúint i gcoinne [na Seice](#), [na Spáinne](#), [Lucsamburg](#), [na Polainne](#), [na Portaingéile](#) agus [na Slóivéine](#) mar gheall ar mhainneachtain rialacha AE maidir le haitheantas [cáilíochtaí gairmiúla sa loingseoireacht intíre](#) a thrasú sa dlí náisiúnta. Leis na rialacha sin, bunaítear córas caighdeánaithe chun daoine a oibríonn árthaí ar uiscebhealaí intíre a dheimhniú agus a aithint, rud a ligeann do shealbhóirí deimhnithe oibriú ar fud an Aontais.



Chuir an Coimisiún tús freisin le nósanna imeachta um shárú i gcoinne [na Gearmáine](#), [na Cróite](#), [na hUngáire](#) agus [na hOstaire](#) toisc nár ghníomhaigh siad de réir sheasamh an Aontais laistigh de Choimisiún na Danóibe. Pléann an eagraíocht idirnáisiúnta sin le córas loingseoireachta abhainn na Danóibe. Vótáil na ceithre Bhallstát ar ábhair a bhfuil inniúlacht sheachtrach eisiach ag an Aontas ina leith gan seasamh réamhbhunaithe AE, rud atá contrártha do phrionsabal an chomhair dhílis a chumhdaítear i gConarthaí an Aontais.

Cánachas díreach

Ráthaítear leis an margadh aonair go mbeidh an tsaoirse ag saoránaigh agus gnólaicthe gluaiseacht, oibriú agus infheistiú thar theorainneacha náisiúnta. Mar sin féin, toisc nach bhfuil rialacha cánachais dhírigh náisiúnta ailínithe lena chéile agus mar gheall ar dhifríochtaí i gcórais chánach na mBallstát, tá bealaí fós ann le pleanáil ionsaitheach cánach a dhéanamh agus le cáin a sheachaint. Chun cosc a chur le neamhchánachas neamhaireach mar thoradh ar chleachtais den sórt sin, comhoibríonn na Ballstáit go dlúth le rialacha náisiúnta a ailíniú trí bhithin treoracha AE.



Chun cosc a chur le neamhchánachas neamhaireach mar thoradh ar chleachtais den sórt sin, comhoibríonn na Ballstáit go dlúth le rialacha náisiúnta a ailíniú trí bhithin treoracha AE.

Ceann de na príomhthreoracha sa réimse sin, a bhfuil tionchar díreach aici ar fheidhmiú an mhargaidh aonair is ea an [Treoir maidir le rialacha i gcoinne cleachtais seachanta cánach](#). D'éirigh leis an gCoimisiún na rialacha sin a fhorfheidhmiú in 2022: ar an gcéad dul síos, trína dtrasú iomlán a áirithiú i ndlí náisiúnta na Bulgáire, na Seice, na Gearmáine, na hÉireann agus na Spáinne.

Chinntigh an Coimisiún go ndearna an Bhulgáir agus an Chipir – tíortha a d'ailínigh a ndlíthe náisiúnta mar thoradh ar nósanna imeachta um sháru – na rialacha a thrasuí i gceart.

Ghlac an Coimisiún céimeanna breise i gcoinne [na Gréige agus na Spáinne](#) as mainneachtain foráil na Treorach maidir le neamhréireanna hibrídeacha droim ar ais a thrasuí. Leis na rialacha sin, coisctear ar cháiniocóirí a bheith ag saothrú na ndifríochtaí idir córais chánach éagsúla d'fhonn níos lú cánach a íoc nó cáin ar bith a íoc, agus mar sin cuirtear cosc le creimeadh an bhoinn cánach.

Rinne roinnt Ballstát eile a reachtaíocht náisiúnta a ailíniú le rialacha cánachais dhírigh an Aontais mar thoradh ar obair fhorfheidhmithe an Choimisiúin: Chuir an Bheilg deireadh lena ríomh idirdhealaitheach ar ioncam ó mhaoin atá suite thar lear; chuir an Spáinn deireadh le cánachas idirdhealaitheach ar eagraíochtaí neamhbhrabúsacha neamhchónaitheacha agus ar a ranníocóirí agus a ndéontóirí; agus réitigh an Ghréig an difríocht a bhí ann i gcóireáil cánach bunaithe ar chritéar na háite (an stáit) ina sealbhaítear na sócmhainní nó na hinfheistíochtaí arna bhfáil le hoidhreacht.

Tar éis roinnt gearán a fuarthas ó shaoránaigh, ghlac an Coimisiún gníomh forfheidhmiúcháin i gcoinne [na Gearmáine](#) chun a rialacha maidir le liúntais d'oibrithe trasteorann a ríomh a ailíniú le dlí AE, chun idirdhealú a sheachaint. Fágadh na hoibrithe, atá fostaithe sa Ghearmáin agus a bhfuil cónaí orthu i dtír chomharsanach, faoi mhíbhuntáiste maidir le liúntais oibre agus breoiteachta agus sochair dífhostaíochta, agus ar an gcaoi sin sáraíodh [rialacha an Aontais](#) maidir le [saorghluaiseacht oibrithe](#).

Réitigh an Coimisiún cás i gcoinne [na Spáinne](#), cás a bhain le pionóis dhíríreacha a fhorchur ar cháiniocóirí na Spáinne toisc nár chuir siad dearbhú isteach maidir le sócmhainní atá acu thar lear trí fhoirm ar líne ('Modelo 720'). Tar éis don Chúirt Bhreithiúnais seasamh an Choimisiúin a dhaingniú, leasaigh an Spáinn a reachtaíocht náisiúnta, i gcomhréir le prionsabal na saorghluaiseachta caipitil. Bhí an cás faoi réir achainí chuig Parlaimint na hEorpa freisin.

Cánachas indíreach

Tá sé mar aidhm ag rialacha an Aontais maidir le CBL agus dleachtanna máil cosc a chur ar bhuntáiste cánach éagórach a bheith ag gnólachtaí i dtír AE amháin i gcomparáid le gnólachtaí i dtíortha AE eile. Dá bhrí sin, cabhraíonn siad le saobhadh iomaíochta sa mhargadh aonair a sheachaint. Chun saorghluaiseacht earraí a chosaint, cinntíonn dlí an Aontais nach ndéanann cánacha a bhaineann le gluaisteáin idirdhealú i gcoinne gluaisteáin a thugtar ó thír eile san Aontas.

Tharchuir an Coimisiún [Málta](#) chuig an gCúirt Bhreithiúnais as cáin bhliantúil níos airde a ghearradh ar chlárú gluaisteán athláimhe a tugadh go Málta tar éis an 1 Eanáir 2009 ó thíortha eile san Aontas ná an cháin a íocadh ar ghluasteáin den chineál céanna arna gclárú i Málta roimh an dáta sin.

In 2022, leag an Coimisiún béim ar leith ar fhaireachán a dhéanamh ar iarrachtaí na mBallstát an [creat comhchoiteann athbhreithnithe do táirgí máil](#), amhail alcól, tobac agus fuinneamh, a chur chun feidhme. Leis na rialacha sin, feabhsaítear an tsaoirse gluaiseachta le haghaidh táirgí máil sa mhargadh aonair trí onnmhairiú agus allmhairiú táirgí máil agus idirghníomhú idir trádálaithe a shimpliú. Cinntíonn siad freisin go mbailítear an cháin cheart.

Chomh maith leis sin, rinne an Coimisiún faireachán ar chur chun feidhme na [rialacha athbhreithnithe maidir le dleachtanna máil ar alcól](#), is infheidhme ón 1 Eanáir 2022. Leis na rialacha sin, bunaítear comhchóras deimhniúcháin do tháirgeoirí beaga, le go mbeadh sé níos éasca dóibh rochtain a fháil ar dhleachtaráí máil ísíl ar fud an Aontais.

Chuir an Coimisiún tús le nósanna imeachta um shárú i gcoinne 16 Bhallstát agus ghlac sé an chéad chéim eile ina imeachtaí i gcoinne [na Beilge](#), [na Gréige](#), [na Laitvia](#), [Lucsamburg](#) agus [na Portaingéile](#) toisc nach ndearna na tíortha sin cumarsáid maidir lena mbearta náisiúnta chun an creat comhchoiteann athbhreithnithe do tháirgí máil a thrasú go hiomlán. Thionscain an Coimisiún nósanna imeachta um shárú i gcoinne 11 Bhallstát agus lean sé den chás i gcoinne [na Portaingéile](#) toisc nár áirithigh sí go ndéanfaí na rialacha athbhreithnithe maidir le dleachtanna máil ar alcól a thrasú ina n-iomláine.

Rinne an Coimisiún faireachán freisin ar chur chun feidhme na mBallstát maidir le [díolúiní sealadacha ó CBL mar fhreagairt ar phaindéim COVID-19](#). Nuair ba threise an phaindéim, lig na rialacha sin don Choimisiún agus do ghníomhaireachtaí an Aontais earraí agus seirbhísí a allmhairiú agus a cheannach gan CBL a íoc chun iad a dháileadh saor in aisce ar na Ballstáit. Chuir an Coimisiún tús le nósanna imeachta um shárú i gcoinne ocht mBallstát agus lean sé leis an nós imeachta i gcoinne [na Cipire](#) toisc nár thrasuigh sí na rialacha sin ina n-iomláine.

Bhí gníomhaíochtaí forfheidhmiúcháin an Choimisiúin dírithe ar bhearta fíoscacha náisiúnta chomh maith, lena ndéantar an iomaíocht a shaobhadh sa mhargadh aonair. Lean an Coimisiún de nós imeachta i gcoinne [na Gréige](#) as cur i bhfeidhm mícheart na díolúine ó CBL ar sheirbhísí



poist tráchtála arna soláthar ag soláthraí seirbhíse uilíche na Gréige. Bhí sé in ann clabhsúr a chur ar imeachtaí um shárú i gcoinne na Gearmáine toisc go gcuireann reachtaíocht na Gearmáine an scéim CBL ar ráta comhréidh d'fheirmeoirí i bhfeidhm go ceart anois, lena bhfaightear réidh le saobhadh iomaíochta.

Chun calaois chánach a chomhrac, cuireann [rialacha maidir le comhar riaracháin](#) iallach ar Bhallstáit, ón 1 Eanáir 2020,

rochtain a thabhairt ar fhaisnéis faoi chlárúcháin feithiclí do Bhallstáit eile, tríd an gCóras Eorpach Faisnéise maidir le Feithiclí agus Ceadúnais Tiomána (EUCARIS). Tar éis idirphlé EU Pilot rathúil, chinntigh an Coimisiún gur ghníomhaigh an Chipir, an Danmhairg, Éire, an Fhrainc, Málta agus an tSlóivéin chun an t-ardán TF a fhorbairt i gceart, rud a chuir ar chumas na n-údarás faisnéis a mhalartú maidir le feithiclí. I gcás Ballstáit amháin, tá próiseas EU Pilot fós ar siúl.

Custam

Sainmhínítear i gCód Custaim an Aontais an creat dlíthiúil le haghaidh rialacha agus nósanna imeachta custaim i gcríoch chustaim an Aontais, agus é curtha in oiriúint do shamhlacha trádála agus d'uirlisí cumarsáide nua-aimseartha.

Chun an Cód a fhorfheidhmiú, rinne an Coimisiún imscrúdú ar an ngearrluacháil earraí, ar chórais TF chustaim sna Ballstáit agus ar mhuirir náisiúnta a bhfuil an éifeacht chéanna acu le dleachtanna custaim idir na Ballstáit. Lean an Coimisiún lena imscrúdú ar fud na mBallstát go léir, maidir le cur chun feidhme [na Scéime Allmhairiúcháin](#), tairseach leictreonach a úsáideann gnólachtaí chun a n-oibleagáidí ríomhthrachtála CBL a chomhlíonadh maidir le ciandíolacháin earraí allmhairithe.



Maidir le pionóis faoin gCód, thug an Coimisiún [tuarascáil](#) chun críche ina ndearnadh measúnú ar sháruithe agus ar phionóis chustaim sna Ballstáit. Leanfar leis an tuarascáil san athchóiriú atá le teacht ar Aontas Custaim AE.

Iomaíocht

Tá sé d'aidhm ag beartas iomaíochta an Aontais cothrom na Féinne a chinntiú lena spreagtar cuideachtaí chun nuálaíocht a dhéanamh agus earraí agus seirbhísí ardchaighdeán a thairiscint ar na téarmaí is fabhraí. Is iad na húdaráis iomaíochta náisiúnta, in éineacht leis an gCoimisiún, a chuireann an beartas seo i bhfeidhm.

Tá ról tábhachtach ag cur chun feidhme na [Treorach ECN+](#) sa phróiseas sin toisc go méadaíonn sé cumhachtaí agus éifeachtacht na n-údarás iomaíochta náisiúnta. Lean an Coimisiún den Treoir a fhorfheidhmiú trí imeachtaí um shárú breise i gcoinne [na hEastóine](#), [Lucsamburg](#), [na Polainne](#) agus [na Slóivéine](#) as gan na rialacha sin a chur i bhfeidhm go hiomlán.

An dóigh bheatha Eorpach agus an daonlathas a chur chun cinn

‘Is léir dúinn go léir sa lá atá inniu ann go gcaithfimid troid ar son ár ndaonlathais. Gach uile lá beo. Ní mór dúinn iad a chosaint ó na bagairtí seachtracha a bhíonn rompu, agus ó na duáilc a chuireann meath orthu ón taobh istigh. Is é dualgas mo Choimisiúin agus an ról is uaisle atá againn ná an smacht reachta a chosaint.’

An tUachtarán von der Leyen san Aitheasc a thug sí faoi Staid an Aontais in 2022



Chun Eoraip níos láidre, níos glaise agus níos sláintiúla a chruthú don chéad ghlúin eile, teastaíonn Eoraip a sheasann dá luachanna agus a chosnaíonn a daonlathais. Is é an dlí an acmhainn is fearr atá ag an Aontas chun tairbhí an Aontais a chur ar fáil do dhaoine, do ghnólaigh agus don chomhshaol. Sin an fáth ar chruthaigh an Coimisiún arís, in 2022, a dhiongbháilte atá sé an smacht reachta, ár luachanna agus ár gcearta bunúsacha a chosaint ar fud an Aontais.

An smacht reachta

Baineann an Coimisiún úsáid as na [huirisí](#) uile atá ar fáil dó chun an smacht reachta a chosaint agus a chur chun cinn san Aontas Eorpach. Gné chumhachtach amháin is ea timthriall bhliantúil [na tuarascála maidir leis an smacht reachta](#).

Sa tuarascáil bhliantúil sin pléitear gach Ballstát agus tá sé d'aidhm aici an smacht reachta a chur chun cinn, ionas nach dtiocfadh fadhbanna chun cinn nó ionas nach rachaidís in olcas. In 2022, chuir an Coimisiún [moltaí tírshonracha](#) maidir leis an smacht reachta ar aghaidh chuig na Ballstáit den chéad uair. Chuaigh an Coimisiún i ngleic le saincheisteanna tromchúiseacha maidir leis an smacht reachta a bhaineann le nósanna imeachta um shárú, go háirithe nósanna imeachta a bhaineann le neamhspleáchas breithiúnach nó le bunphrionsabail dhlí an Aontais.

Cuid eile de bhosca uirlisí AE maidir leis an smacht reachta is ea an [Rialachán maidir le Coinniollacht](#), rud a chosnaíonn buiséad an Aontais ó shárúithe ar an smacht reachta sna Ballstáit. Bhain an Coimisiún lánúsáid as an Rialachán in 2022. An 15 Nollaig 2022, bunaithe ar thogra ón

gCoimisiún faoin Rialachán maidir le Coinníollacht, ghlac an [Chomhairle](#) bearta chun buiséad an Aontais a chosaint ar sháruithe ar phrionsabail an smachta reachta san Ungáir.

Lean an Coimisiún de nós imeachta um shárú i gcoinne [na Polainne](#) maidir le Binse Bunreachtúil na Polainne agus a chásdlí. Mheas an Coimisiún gur sháraigh rialuithe ón mBinse forálacha Chonarthaí an Aontais Eorpaigh agus nach raibh siad i gcomhréir le prionsabail ghinearálta an neamhspleáchais, na tosaíochta, na héifeachtachta, chur i bhfeidhm aonfhoirmeach dhlí an Aontais agus éifeacht cheangailteach rialuithe Chúirt Bhreithiúnais an Aontais Eorpaigh.

I gcás eile i gcoinne na Polainne, le linn 2022 lean an Coimisiún dá chuid glaonna ar phionóis laethúla a íoc, rud a [d'ordaigh](#) Leas-Uachtarán na Cúirte Breithiúnais. Sa [nós imeachta um shárú](#) sin, d'iarr an Coimisiún bearta eatramhacha chun neamhspleáchas bhreithiúna na Polainne a chosaint mar ábhar práinne.

Daoine a thuairiscíonn sáruithe ar dhlí an Aontais a chosaint



Cuidíonn sceithirí eolais le damáiste a chosc agus bagairtí nó dochar do leas an phobail a bhrath. Cuireann siad luachanna bunúsacha an smachta reachta agus an daonlathais chun cinn chomh maith leis an gceart chun saoirse cainte. Cosnaíonn [rialacha an Aontais](#) sceithirí eolais ó fhrithbheart as sáruithe ar dhlí an Aontais a thuairisciú. Ceanglaítear leo ar na Ballstáit foráil a dhéanamh maidir le bealaí

éifeachtacha chun sáruithe den sórt sin a thuairisciú faoi rún chomh maith.

In 2022, chuir an Coimisiún tús le himeachtaí um shárú i gcoinne 26 Bhallstát, toisc nár thrasuigh siad na rialacha in am nó toisc gur chuir siad moill ar a dteacht i bhfeidhm. Ghlac an Coimisiún an chéad chéim eile sa nós imeachta i gcoinne 19 [mBallstát](#) inar leanadh ar aghaidh leis an sárú.

Idirdhealú, ciníochas agus seineafóibe a chomhrac

Foráiltear [le rialacha an Aontais](#) go bhfuil gníomhartha ciníochais agus seineafóibe inphionóis le pionóis choiriúla éifeachtacha, chomhréireacha agus athchomhairleacha. In 2022, lean an Coimisiún dá iarrachtaí na rialacha sin a fhorfheidhmiú. Mar shampla, rinne an Liotuáin athbhreithniú ar a cód coiriúil, rud a réitigh easnaimh maidir le coiriúlú fuathchainte agus coireanna fuatha. Ghlac an Coimisiún gníomh chun daoine LADTIA a chosaint ar leithcheal chomh maith.

Rinne an Coimisiún [an Ungáir](#) a tharchur chuig an gCúirt Bhreithiúnais maidir le rialacha náisiúnta a dhéanann leithcheal ar dhaoine bunaithe ar a ngréaschlaonadh agus a bhféiniúlacht inscne. Cuireann dlí na hUngáire cosc nó srian le rochtain ar ábhar a 'chuireann chun cinn nó a léiríonn' na coincheapa dá dtagraítear sa dlí mar 'imeacht ón bhféiniúlacht a fhreagraíonn don ghnéas tráth na breithe, athrú gnéis nó homaighnéasachas' do mhionaoisigh. Mheas an Coimisiún go sáraíonn an dlí sin roinnt rialacha AE – rialacha an mhargaidh aonair agus cearta bunúsacha daoine aonair, go háirithe daoine LADTIA – chomh maith leis na comhluchanna atá i gcroílár an Aontais.

Cothromaíocht oibre is saoil a chur chun cinn

Thionscain an Coimisiún imeachtaí um shárú i gcoinne [19 mBallstát](#) toisc nár thrasuigh siad [Treoir maidir le Cothromaíocht Oibre is Saoil](#) go hiomlán. Tá sé d'aidhm ag an Treoir comhionannas rannpháirtíochta a chinntiú sa mhargadh saothair trí chothromaíocht idir an obair agus an saol teaghlaigh a éascú d'oibrithe a bhfuil freagrachtaí cúraim orthu agus trí chomhroinnt chomhionann freagrachtaí cúraim a spreagadh idir tuismitheoirí.



Sonraí pearsanta a chosaint

Is ceart bunúsach de chuid shaoránaigh an Aontais é cosaint sonraí pearsanta, rud atá cumhdaithe i gCairt um Chearta Bunúsacha an Aontais. Mar ábhar tosaíochta, rinne an Coimisiún measúnú le feiceáil an gcomhlíonann an reachtaíocht náisiúnta dlíthe ábhartha an Aontais, eadhon an [Rialachán Ginearálta maidir le Cosaint Sonraí \(RGCS\)](#) agus an [Treoir maidir le Cosaint Sonraí i Réimse Fhorfheidhmiú an Dlí](#), ag leanúint nósanna imeachta um shárú nuair ba ghá. D'fhoilsigh an Coimisiún a [chéad tuarascáil](#) maidir le cur i bhfeidhm agus feidhmiú na Treorach maidir le Cosaint Sonraí i Réimse Fhorfheidhmiú an Dlí.

Ós rud é go bhfuil ról ríthábhachtach ag na húdaráis náisiúnta cosanta sonraí maidir le rialacha cosanta sonraí a fhorfheidhmiú sna Ballstáit, sheas an Coimisiún ar son a neamhspleáchais agus chun a chinntiú go bhfuil cumhachtaí ceartaitheacha acu. Rinne an Coimisiún [thuairisciú](#) ar chur i bhfeidhm [rialacha](#) cosanta sonraí ag institiúidí agus gníomhaireachtaí an Aontais freisin.

Saoránacht an Aontais a chosaint

Tá saoránacht an Aontais agus na cearta a ghabhann léi i gcoirlár an Aontais. Daoine a bhfuil saoránacht Bhallstáit de chuid an Aontais Eorpaigh acu, is saoránaigh den Aontas Eorpach iad freisin. Gabhann an ceart chun saorghluaiseachta, rochtain ar an margadh aonair, agus an ceart chun vótáil agus chun bheith tofa i dtoghcháin Eorpacha agus áitiúla le saoránacht an Aontais go huathoibríoch. Ar na cúiseanna sin, tá na coinníollacha maidir le náisiúntacht a fháil agus a chailleadh, arna rialú le dlí náisiúnta gach Ballstáit, faoi réir chomhlíonadh dhlí an Aontais.



Chinn an Coimisiún [Málta](#) a tharchur chuig an gCúirt Bhreithiúnais mar gheall ar a scéim saoránachta d'infheisteoirí. Tríd an scéim seo, ar a dtugtar scéim 'an phas órga', bronnar saoránacht Mhálta – agus dá bhrí sin saoránacht an Aontais – mar mhalairt chórasach ar iocaíochtaí agus infheistíochtaí réamhchinntithe, gan nasc dílis le Málta.

Comhar breithiúnach agus cearta duine aonair in ábhair choiriúla

Is é an [Barántas Gabhála Eorpach](#) an ionstraim comhair bhreithiúnaigh is tábhachtaí de chuid an Aontais. Tá sé d'aidhm aige a chinntiú nach mbaineann daoine, atá ag iarraidh an ceartas a imghabháil, leas as teorainneacha oscailte agus saorghluaiseacht san Aontais. Dá bhrí sin, ghlac an Coimisiún céimeanna rithábachtacha in 2022 chun a rialacha a fhorfheidhmiú, trí thús a chur le cásanna um shárú i gcoinne [na Bulgáire](#), [Lucsamburg](#), [na Rómáine](#) agus [na Slóivéine](#) toisc gur thrasuigh siad an [Cinneadh Réime maidir leis an mBarántas Gabhála Eorpach](#) go mícheart.



Is é an bunús atá le comhar breithiúnach idir na Ballstáit maidir le hábhair choiriúla prionsabal an aitheantais fhrithpháirtigh do bhreithiúnais agus do chinntí breithiúnacha. In [dhá bhreithiúnas](#), dheimhnigh Cúirt Bhreithiúnais an Aontais Eorpaigh gur mhainnigh Éirinn rialacha an Aontais a thrasú i réimsí [na bpiambhreitheanna coimeádta](#), [an chailte saoirse](#) agus [na mbeart maoirseachta mar rogha malartach ar choinneáil shealadach](#).

Maidir le cearta daoine atá faoi dhrochamhras agus daoine cúisithe in imeachtaí coiriúla, lean an Coimisiún de [Theoracha an Aontais maidir le Cearta Nós Imeachta](#) a fhorfheidhmiú: chuaigh sé ar aghaidh leis an dara céim sa nós imeachta i gcoinne [na hÉireann](#) agus [na Portaingéile](#) as [rialacha](#) maidir leis an gceart chun faisnéise a thrasú go mícheart, agus i gcoinne [na hEastóine](#), [na Polainne](#) agus [na Fionlainne](#) as [rialacha](#) maidir le toimhde na neamhchiontachta a thrasú go neamhiomlán.

Leanadh den fhaireachán a rinne an Coimisiún ar chur chun feidhme na [Treorach maidir leis an gcomhrac i gcoinne na calaoise ar leasanna airgeadais an Aontais](#). Ghlac sé a [dhara tuarascáil ar chur chun feidhme](#) agus chuir sé tús le himeachtaí um shárú i gcoinne naoi [mBallstát](#) toisc nach raibh a reachtaíocht náisiúnta i gcomhréir leis an Treoir sin.

Slándáil

In 2022, lean an Coimisiún de [Straitéis an Aontais um an Aontas Slándála](#) a chur i gcrích, agus é mar aidhm aige sábháilteacht, rathúnas agus folláine a chur ar fáil do gach duine san Aontas. Tá an tslandáil i gcroílár bhunphrionsabail ár sochaithe, ár ngeilleagar agus ár ndaonlathas freisin.

Bunaítear le reachtaíocht an Aontais maidir le hairm thine íoschaighdeán choiteanna maidir le hairm thine shibhialta a fháil, a shealbhú agus a mhalartú ar bhonn tráchtála, le gur féidir iad a aistriú thar teorainneacha. Cuidíonn sé sin le dul i ngleic leis an mbaol go mbéarfadh sceimhlitheoirí greim ar airm thine.

Lean an Coimisiún de nósanna imeachta um shárú breise i gcoinne [na Bulgáire](#), [na Gréige](#), [na hÉireann](#), [Lucsamburg](#) agus [na Sualainne](#) toisc nár thrasuigh siad go hiomlán rialacha éagsúla an Aontais maidir le [marcáil arm tine](#) nó maidir le [sonraíochtaí teicniúla](#) le haghaidh airm rabhaidh agus foláirimh. Rinne an Coimisiún an [tSualainn](#) a tharchur chuig an gCúirt Bhreithiúnais toisc nár thrasuigh sí [rialacha an Aontais](#) maidir le fáil agus seilbh arm tine.

Ghlac an Coimisiún bearta breise chun forfheidhmiú cuí rialacha maidir le [drugaí](#) a chinntiú: thionscain sé cásanna um shárú i gcoinne na Beilge, na Bulgáire, na hÉireann, na Cipire, na Polainne agus na Rómáine toisc nach ndearnadh siad [sainmhínte áirithe](#) ar ‘dhrugaí’ a thrasú, go háirithe maidir le substaintí sícighníomhacha nua áirithe a áireamh. Agus ghlac sé an chéad chéim eile sa chás i gcoinne [na hÉireann](#). Sna cásanna sin go léir, rinne na Ballstáit lena mbaineann na sárúithe a réiteach ina dhiaidh sin.

D'fhorfheidhmigh an Coimisiún rialacha an Aontais maidir le cionta coiriúla tromchúiseacha áirithe agus [imscrúduithe airgeadais](#) chomh maith. Lean sé ar aghaidh leis na nósanna imeachta i gcoinne [na Cróite](#), [na hÉireann](#) agus [na Fionlainne](#) toisc nár thrasuigh siad [rialacha](#) lena n-éascaítear úsáid faisnéise airgeadais agus faisnéise eile chun cionta coiriúla áirithe a chosc, a bhrath, a imscrúdú nó a ionchúiseamh.

Lean an Coimisiún ar aghaidh ag cur na slándála chun cinn san aois dhigiteach. Chun na críche sin, lean an Coimisiún de nósanna imeachta um shárú i gcoinne [na Beilge](#), [na Bulgáire](#), [na Seice](#), [na Gréige](#), [na Spáinne](#) agus [Lucsamburg](#) toisc nach ndearna siad reachtaíocht náisiúnta as an [Treoir](#) maidir le calaois agus góchumadh modhanna íocaíochta neamhairgid a chomhrac.

Is tosaíocht don Choimisiún é comhrac i gcoinne [mí-úsáid ghnéasach leanaí](#). Chun dul i ngleic leis, chuir an Coimisiún tús le nósanna imeachta um shárú i gcoinne [na hÉireann](#), [na Spáinne](#), [na hIodáile](#) agus [na Portaingéile](#) i dtaca leis an [Treoir](#) maidir le mí-úsáid ghnéasach agus teacht i dtír gnéasach ar leanaí agus pornagrafaíocht leanaí a chomhrac. Go háirithe, rinne na Ballstáit sin forálacha áirithe den Treoir a thrasú go mícheart maidir le cionta áirithe a shainiú, maidir le dúshaothrú leanaí a chosc agus maidir le cúnamh a thabhairt d'íosparthaigh.

Imirce agus Tearmann

Dhear an Coimisiún [comhaontú nua maidir le himirce agus tearmann](#) chun próiseas imirce agus tearmainn níos córa, níos éifeachtaí agus níos inbhuanaithe a chinntiú san Aontas, agus tá an



comhaontú faoi réir plé leis na comhreachtóirí anois. Ar an iomlán, cumhdaíonn [beartas imirce](#) an Aontais bainistiú teorainneacha, beartas víosaí, imirce neamhrialta, tearmann agus imirce dhleathach. Tá cur chun feidhme comhsheasmhach agus éifeachtach maidir le hurramú iomlán cearta bunúsacha daoine aonair ríthábhachtach le go n-éireoidh leis an mbeartas sin.

Lean an Coimisiún d'fhaireachán a dhéanamh ar chur i bhfeidhm na reachtaíochta reatha agus ghlac sé céimeanna foirmiúla i gcoinne [na Beilge](#), [na Gearmáine](#), [na Gréige](#) agus [na Spáinne](#) as an [Treoir um Fhilleadh](#) chur chun feidhme go mícheart, agus i gcoinne [na hIodáile](#) agus [Mhálta](#) as an [Rialachán](#) maidir le doiciméad taistil Eorpach um fhilleadh a chur chun feidhme go mícheart.

Leandh den obair fhorfheidhmiúcháin lena chinntiú gur féidir le náisiúnaigh nach den Aontas iad, a bhfuil cónaí orthu go dlíthiúil san Aontas, leas a bhaint as a gcearta faoi na Treoracha maidir le himirce dhleathach. Mar shampla, chuir an Coimisiún clabhús le nós imeachta um shárú i gcoinne na hIodáile maidir leis an [Treoir um Chead Aonair](#) tar éis don Iodáil a reachtaíocht náisiúnta a athrú. Is féidir le náisiúnaigh nach den Aontas iad, atá ag obair agus a

bhfuil cónaí orthu go dlíthiúil san Iodáil, tairbhe a bhaint as cóir atá comhionann le cóir náisiúnaigh na hIodáile i réimsí éagsúla anois, coinníollacha oibre, saoirse comhlachais, oideachas, slándáil shóisialta agus sochair chánach ina measc.

Smachtbhannaí a chur i bhfeidhm i gcoinne na Rúise

Tá níos mó ná 40 córas smachtbhannaí éagsúla i bhfeidhm ag an Aontas, arna nglacadh faoin [gComhbheartas Eachtrach agus Slándála \(CBES\)](#). Áirítear leis sin [smachtbhannaí](#) atá mar fhreagairt ar ionsaí míleata na Rúise i gcoinne na hÚcráine. In 2022, ghlac an tAontas naoi bpacáiste smachtbhannaí, nach raibh a leithéid ann riamh, lena gcumhdaítear raon earnálacha, amhail airgeadas, fuinneamh, na meáin, iompar agus trádáil, chun srian a chur ar chumas na Rúise an cogadh a mhaoiniú.



Chuir an Coimisiún cur chun feidhme aonfhoirmeach na smachtbhannaí sin chun cinn agus rinne sé faireachán ar a bhforfheidhmiú. Chun eolas a fháil ar sháruithe féideartha, sheol an Coimisiún [uirlis do sceithirí eolais maidir le smachtbhannaí an Aontais](#), ardán slán ar líne a chuireann ar chumas sceithirí sáruithe a thuairisciú gan a n-ainm a thabhairt.

Fuair sé os cionn 400 tuarascáil ábhartha suas go dtí deireadh 2022. Chuir sé ceistneoirí chuig na Ballstáit chomh maith chun aiseolas a bhailiú maidir le saincheistanna cur chun feidhme. D'eagraigh sé grúpaí saineolaithe freisin chun gníomhaíochtaí cur chun feidhme na mBallstát a chomhordú agus chun dea-chleachtais a roinnt. Ar deireadh, d'fhoilsigh sé thart ar 550 Ceist agus Freagra ar [shuíomh gréasáin tiomnaithe](#) chun cabhrú le páirtithe leasmhara iad a chur i bhfeidhm.